

# WANTOK

NIUSPEPA BILONG YUMI OL PAPUA NIUGINI STRETI 27 YIA NAU

24 pes

Namba 1,271

Wik i stat long Fonde Novemba 5, 1998

70t

## INSAIT

• Straik bilong Telikom, hevi long ol haus mani.

- pes 2



Lae Nius, pes 9-11

• Wakon tok nogat man i pusim em.

• Skate tok em i no stapim sas.

- pes 3

• Sekim tok pilai wantaim Kanage bilong dispela wik

- pes 15



• Ol plisman bilong Is na Wes Sepik provins i pinisim kos bilong ol long stretim ol hevi long wok bilong ol. Dispela em namba wan kos we i kamap aninit long sponsa bilong AusAID. Foto: Godfried Yassafar.

# Plis redim ol witnes bilong pamuk vidio

### ... Michael Mel bai wanpela witnes

**YAKAM KELO i raitim**

PLIS i tokaut pinis long nem bilong ol witnes husat bai givim evidens long kot bilong pamuk vidio egensim Pater Robert Lak na Regina Pera Gibolo long Novemba 18, 1998.

Plis bai salim samons tu long askim olupela memba bilong Hagen na biknem bisnisman Michael Mel long kamap na givim evidens long dispela pamuk vidio tep.

Dairekta bilong Plis Prosekyuta Thomas Eluh i tok insait long 22 witnes bilong ol, ol bai kisim tupela witnes i kamap long Novemba 18 long tokaut. Tupela bai tokaut sapos em i tru olsem Regina Pera Gibolo na Westen Hailans Gavana Pater Robert Lak i mekim dispela pamuk vidio. Wanpela bilong dispela tupela witnes em brata bilong Regina,

Sent Paul Pera. Narapela witnes em Mokai Raim, wanpela viles kot mejistret na kaunsel bilong ples.

Ol witnes em: Mokai Raim, Wama Koi, John Bulda, Joseph Andawor, Mek Dui, Peter Raim, Sent Paul Pera, Olding Ten, Sent Lota, Enta Wet, Paul Gant, Dokta Fred Wurr, Dokta James Kintwa, Pater Gordon Guinn, Andrew V Johnston, Steven Mala, David Kilo, Getorihio Willie, Helen Naime, Augustine Shong, Timothy Ipai na Terry Apollos.

Loya bilong Regina Powes Parkop i tok em i no stret long plis i bin soim dispela pamuk vidio long ol witnes long lukim. Bikos dispela vidio em tambu long ol manmeri nabaut i lukim we lo i tambu long en.

Mista Parkop i tok ol witnes i mas stap tasol na kamap long kot na larim kot i skelim ol toktok na evidens bilong ol na tu larim ol i ken lukim pes na tokaut sapos em i tru Regina na Pater Lak i mekim dispela pamuk vidio.

Mista Parkop i tok tu olsem tupela witnes insait long dispela ripot i man bilong ples na i nogat save long rit na rait.

Tasol olsem wanem na tupela i gat toktok long pepa long tok Inglis we tupela i givim evidens long dispela pamuk vidio.

Em i tok aninit long lo bilong Distrik Kot Ekt seksen 94.c ol lain i no save long rit na rait i mas klia gut long ol toktok pastaim long ol i ken mekim ripot bilong ol long kot.

Mista Parkop i laikim sapos ol famili na ol lain husat i gat tok long dispela piksa i mas kamap long kot na givim evidens tu.

Loya bilong plis Thomas Eluh i tok plis i bin soim dispela vidio long ol witnes bihainim tok stia bilong Sief Sensa husat i go pas long ol kain piksa nogut olsem.

Mista Eluh i tok ol i soim piksa long ol witnes bikos ol dispela witnes i save na ol i ken tokaut taim ol i lukim dispela piksa. Na dispela i ken mekim isi long ol i givim evidens long kot olsem em i tru o i no tru.

Long toktok bilong tupela ples man ya, Mista Eluh i tok tupela ples man ya i bin klia gut long ol toktok pastaim long tokples bilong tupela yet na bihainim tupela i tokaut gen na ol i raitim long Inglis olsem ripot bilong tupela i go long kot.

## PDM lidasip i bungim salens

**JAMES KILA na WENCENLAUS MAGUN i raitim**

WANPELA bikpela miting bilong ol memba bilong Pipels Demokratik Muvmen (PDM) pati bai kamap long neks wik Fonde, Novemba 12 long toktok long pati lidasip.

Insait long wanpela spesel miting bilong ol PDM long aste, 20 ol pati memba i bin stap na tokorait long dispela lidasip miting long neks wik. Narapela 5-pela PDM memba tasol i no bin kamap.

Ol dispela 20 PDM memba i pasim tok olsem long neks wik ol bai holim dispela miting na bikpela toktok tru em pati lidasip. Miting long neks wik ya tu bai lukim ol memba i vot long nupela lida bilong PDM.

I bin gat sampela toktok i kamap long rausim dispela miting we i kamap long aste, tasol bikos 20-pela ol pati memba i stap, miting ya i bin gohet.

Ripot Wantok i kisim i tok olsem Deputi Praim Minista na lida bilong PDM, laoro Lasaro i bin laik stapim dispela miting long las minit. Tasol ol pati memba i strong long holim dispela miting.

Insait long dispela miting long aste dispela 20 PDM memba i tokorait long muvim miting i go long Fonde, Novemba 12 long 5 kilok long apinun.

**i go moa long pes 2**

# Win a Coca-Cola SPINBAG

## 100,000 to be won

Collect from any Coca-Cola Amatil depot by 31/1/99

COCA-COLA AND THE CONTOUR BOTTLE DESIGN ARE REGISTERED TRADE MARKS OF THE COCA-COLA COMPANY





# Plis i sasim bos bilong ami

PLIS long Mosbi i sasim bos bilong PNG Difens Fos Jerry Singirok long sas bilong pretim mama lo bilong Papua Niugini na tu long rausim Gavman we mama lo i kamapim.

Plis i redim sas bilong ol arapela lain olsem loya bilong ICRAF Powes Parkop, olpela Gavana bilong Isten Hailans provins Peti Lafanama na arapela memba bilong NGO olsem John Napo na Jonathan Hoata. Na plis bai sasim ol tu taim ol i pinisim ol ripot bilong ol.

NCD Plis Komanda John Wakon i tok em i mekim wok bilong em olsem plisman we lo i oraitim em long mekim. Long dispela yia, Mista Wakon i bin tokaut olsem em bai traim long opim na stretim ol bikpela hevi na sas we i stap hait yet. Dispela i karamapim tu ol bikpela sas bilong ol lida na ol bikpela trabel na hevi we i bin kamap na plis i no pinisim yet.

Bos bilong Mosbi Plis i tok em i no pret bikos em i mekim wok bilong em bihainim lo. Na em bai sasim husat man i laik bagarapim wok bilong em.

Mista Wakon i tok kabinet i nogat pawa long rausim em long wok bilong em. Tasol Komisina bilong plis Peter Aigilo tasol i ken rausim em long wok sapos em i no mekim gut wok bilong em o em i brukim wanpela lo.

Plis i sasim Komanda bilong ami Jerry Singirok long go pas long ol ami na pretim Gavman bilong Sir Julius Chan na Chris Haiveta long las yia 1997. Long Jun 17, ol ami i bin holim sotgan na was long ausait bilong palamen na lokim olgeta lida insait long palamen haus. Bihain long dispela straika, Sir Julius Chan, Chris Haiveta na Mathias Ijape i bin lusim wok bilong ol. Plis i sasim Singirok na ol memba bilong NGO bikos long yusim sotgan na pretim lo bilong kantri na rausim Gavman bilong kantri. Mista Singirok i bin sanap long kot tu long kontrak bilong Sandlain ami we Gavman i bin kisim i kam long las yia.

Mista Wakon i tok nau kot bilong Sandlain i pinis, loya bilong plis na loya bilong Singirok i bin bung na pasim tok long kamapim dispela kot bilong Singirok long Novemba 6 long sas bilong pretim lo bilong kantri. Em i tok Singirok i stap aninit yet long K100 beil.

Oposisen lida Bernard Narokobi i tok Mista Wakon i mas go het long wok bilong em long sasim Singirok na arapela lida na memba husat i go pas long dispela hevi long las yia. Wanpela lida i no ken stapim em bikos plis i mekim wok bilong ol we lo i makim ol long mekim.

Mista Narokobi i tok sapos Gavman bilong Bill Skate i yusim wok bilong politiks na stapim plis long i no kamapim kot egensim ol dispela lain, dispela bai narakain pasin olgeta insait long kantri we bai i pretim tru na bagarapim tru mama lo bilong kantri.

PNG Plis Asosiesen long dispela wik tu i mekim wankain singaut olsem ol politiks i no ken pretim wok bilong plis. Bikos ol i mekim wok bilong ol long sasim man na kot yet bai mekim disisen long rausim o kotim man.

PNG Plis Asosiesen i tok ol i amamas long wok bilong bos bilong ol John Wakon na ol bai sapatim em. Ol i tok nogat wanpela bikpela man i stap antap long lo bikos lo em bilong olgeta liklik man na bikpela man wankain.

Gavman bilong Bill Skate i bin makim Jerry Singirok long olpela wok bilong em olsem komanda bilong ami long las mun. Olpela Gavman bilong Sir Julius Chan i bin rausim em long kisim ol ami na straik egensim Gavman long las yia. Em i bin kamap long kot bilong Sandlain na tu dispela sas bilong pretim mama lo na Gavman i bin kisim em las yia. Nau em i kam bek gen long wok bilong em tasol planti lida i bin toktok long Mista Singirok i noken kisim wok bilong em bek inap em i klinim gut nem bilong em pastaim.

# Nogat man o politiks i pusim mi, Wakon i tok

## YAKAM KELO i raitim

NCD Plis Komanda John Wakon i tok nogat man o politiks i pusim em long sasim bos bilong ami Jerry Singirok.

Mosbi plis i sasim tu arapela lain husat i bin sapat wantaim Jerry Singirok na ol ami long las yia long rausim Gavman na brukim lo we i banisim wok bilong ol ami. Ol lain ya em ol Non Gavman Ogenaisesen memba olsem Jonathan Hoata, John Napo, loya Powes Parkop na olpela Gavana bilong Isten Hailans provins Peti Lafanama.

Mista Wakon i tok plis i sasim olgeta lain ya pinis na ol i wok long redim pepa na ripot bilong ol long kamapim kot bilong ol.

Mista Wakon i tok husat lida i stap insait tu long dispela sas i no winim lo, maski em i bos bilong ami, bos bilong plis o Praim Minista, olgeta man i wankain aninit long lo bilong kantri.

Mista Wakon i tok nogat wanpela man o samting i pusim em long sasim ol dispela lain bikos dispela sas em

wanpela bilong ol planti bikpela trabel na ripot we plis i no bin pinisim yet olsem na ol i mas karimaut na pinisim.

Arapela ripot i tok ami Askim Praim Minista Bill Skate long rausim dispela sas bilong em bikos em i ting Gavman i makim em bek long wok bilong em long ol i mas wok bung wantaim long ronim kantri.

Ripot i tok Praim Minista i bin askim Minista bilong Plis Thomas Pelika long singautim bos bilong plis, Plis Komisina Peter Aigilo husat i stap nau long Amerika long kam bek na stretim dispela samting.

Tasol ripot i kam long opis bilong Praim Minista i tok dispela i no tru. Namba tu Praim Minista lairo Lasaro wantaim siaman bilong PNGBC beng Peter O'Niell i tok tupela i no bin stap insait long dispela bung wantaim Praim Minista long Fraide.

Mista Wakon i tok em i wanpela strit plisman na sapos Gavman i laik askim Komisina Peter Aigilo long rausim em, ol i mas tokaut long wanem trabel tru em i mekim we i brukim lo. Mista Wakon i tok, tru politiks i ken askim

Komisina Aigilo long rausim em long Mosbi na salim em i go long narapela provins long wok.

NCD Plis Komanda John Wakon i tok sas bilong dispela asua Jerry Singirok na ol lain bilong em i mekim i olsem tripela krismas long kalabus.

Lida bilong Oposisen Bernard Narokobi i tok em bai kotim husat man i brukim mama lo insait long dispela sas bilong pretim lo na Gavman bilong kantri.

Mista Narokobi bai mekim dispela sapos Gavman i stapim bos bilong NCD Plis Komanda John Wakon long stapim sas egensim bos bilong PNG Difens Fos Jerry Singirok na ol lain husat i sapatim em long kamapim straik egensim lo na Gavman bilong kantri. Bai mi kotim ol sapos ol i pretim wok bilong plis, em i tok.

Mista Narokobi i tok sapos Gavman i stapim bos bilong NCD Plis Komanda John Wakon long kotim Jerry Singirok na ol lain i bin sapat wantaim em, dispela bai pretim tru na bagarapim tru strong bilong mama lo long kantri.

Em i tok maski wanem bikman o lida bilong kantri i gat

sas, palamen o kabinet i nogat pawa long rausim dispela sas bilong ol.

Mista Narokobi i tok em i bin tok klia long bipo olsem Jerry Singirok i no ken kisim bek wok bilong em olsem ami Komanda. Tasol nau em i kisim bek, wanpela rot tasol long bihainim em, Gavman i mas saspandim o lusim em long wok bilong em inap kot i stretim olgeta hevi bilong em pastaim. Dispela em rot we olgeta lida na bikman i save bihainim taim ol i gat sas long stretim long kot.

Mista Narokobi i tok ol lida bilong palamen i nogat rait long kontrolim wok bilong ol dipatmen. Ol i ken mekim polisi na lo tasol na i no long go pas long wok bilong ol. Sapos Gavman i mekim olsem, em i mekim bikpela asua tru long brukim mama lo we ol lida yet i kamap long em, em i tok. Sas bilong dispela i olsem K10,000 fain o 10 yia kalabus.

Em i tok rul bilong lo i mas sanap strong olsem na husat man i brukim lo long bikpela opis bilong Gavman o kantri em i mas kisim mekimsave bilong lo.

## Skate tok em i no stapim sas


PRAIM Minista Bill Skate i tok olgeta toktok olsem em i bin askim Plis Minista Thomas Pelika long singautim Plis Komisina Peter Aigilo long daunim sas bilong Difens Komanda Jerry Singirok i no tru.

Mista Skate i tok em i no bin traim tu long stapim wok bilong plis we ol i sasim Jerry Singirok o em i no mekim wanpela samting long bagarapim sas bilong Jerry Singirok.


Plis i sasim Singirok long pasin bilong kisim ol ami na rausim Gavman na pretim lo bilong kantri long las yia taim hevi bilong Sandlain i bin kamap.

Loya bilong Jerry Singirok Moses Murray i tok tu olsem em i no amamas tru long pasin bilong ol plisman we ol i bin toktok pinis long ausait olsem ol ba sasim Jerry Singirok.

Mista Murray i tok em i ting NCD Plis Komanda John Wakon i karimaut wok bilong em yusim pasin politiks tasol long sasim Jerry Singirok aninit long dispela sas.



• Jerry Singirok.



• Simon Pentanu.



• PM Bill Skate.

Mista Murray i tok dispela sas bilong Singirok i bin kamap las yia na ol plis i bin lusim bek na i stap long mak bilong rausim.

Ol mausman bilong Non Gavman Ogenaisesen (NGO) i salensim tu wok bilong John Wakon we ol i ting i no stret bikos ol i laikim Mista Wakon i mas sasim tu ol lain husat i bin karim ol ovasis ami bilong Sandlain i kam long PNG.

Eksekutiv opisa bilong Melsol Mark Woiwabal i tok hevi bilong Sandlain ami tasol i mekim na ol dispela samting i kamap. Olsem na ol plis i mas sasim tu ol man olsem Sir Julius Chan, Chris Haiveta na Mathias Ijape long kisim Sandlain ami i kam long PNG.

Sief Ombudsmen Komisina Simon Pentanu i askim olgeta lain long i noken pret o wari

nabaut bikos kot i no painim wanpela man i asua o brukim lo yet. Em i tok tu olsem Ombudsmen Komisina i mekim wok painimaut bilong em tu long dispela sas bilong Jerry Singirok bikos em i kam bek gen olsem lida na opis bilong em i stap aninit long Lidasip Kod. Ombudsmen Komisina i toksave pinis long Mista Singirok long dispela wok bilong ol.

# WANTOK

NIUSPEPA BILONG OL PAPA NIUGINI

## Larim John Wakon i pinisim wok

NCD Plis Komanda John Wakon i tok em i laik klinim sampela bikipela hevi na trabel we i stap long rekot bilong plis longpela taim. Em i tok sas bilong Jerry Singirok tu i wanpela bilong ol.

Dispela wik planti toktok sait i kamap long salensim o kwestenim wok bilong John Wakon na ol plisman bilong em. Ol Melsol o NGO i tok John Wakon i mas sasim tu ol lida husat i bin kisim Sandlain ami i kam we i kamapim dispela hevi las yia egensim Gavman. Pasin bilong pusim moa toktok o salens i go antap long wok bilong ol plisman i no gutpela bikos em i bilong traim pretim wok o daunim man long mekim wok bilong em. Loya bilong Singirok Moses Murray i tok pasin Wakon i mekim i olsem politiks wok. Dispela em i narapela kain salens gen long traim kwestenim wok bilong ol plisman.

Sief Ombudsmen Komisina Simon Pentanu i tok ol lain i kisim sas i noken pret bikos kot i no tok wanpela man i brukim lo yet. Olsem na larim lo i mekim wok bilong em. Ombudsmen nau i mekim wok painimaut i go insait long Jerry Singirok aninit long lo i banisim ol lida o Lidasip Kod. Bikos Singirok em bos bilong ami aninit long dispela lo bilong Lidasip Kod taim em i kisim bek wok bilong em. Planti lida i sanap pinis long dispela kot bilong Lidasip Kod we dispela yia olpela memba bilong Yangoru Sausia Gabriel Dusava i stap long en na lus long kot.

# WANTOK

NIUSPEPA BILONG YUMI OL PNG STRET

P. O. Box 1982, Boroko  
Telepon namba: 325 2500  
Feks namba: 325 2579

## PE BILONG WANPELA YIA 52 NIUSPEPA

PLES	AIR
Arapela PNG eria	K 52
Ostrelia na Nu Silan	K84 (\$US46)
Esia Pasifik na Japan	K99 (\$US55)
Amerika na Yurop	K172 (\$US95)

# Wes Nu Briten Gavman bai kisim 20 pesen welpam sea

VERONICA HATUTASI i raitim

OL PIPEL bilong Wes Nu Briten bai i kisim 10 pesen sea bilong Stet long welpam kampani, Nu Briten Welpam Limitet (NBPOL) taim em i brukimol Stet sea i go long Provinsel Gavman.

Praim Minista Bill Skate taim em i tokaut long dispela samting las wik i tok dispela em i bilong ol pipel long Wes Nu Briten na Provinsel Gavman i stap olsem trasti o em i lukautim mani bilong ol pipel tasol.

Ol sea sel agrimen na ol arapela agrimen long dispela samting namel long

Stet na Kulim Berhad kampani bilong Malaysia i soim olsem dispela kampani i holim 90 pesen sea tasol em i transferim narapela 10 pesen sea i go long Provinsel Gavman bilong lukautim ol pipel, Mista Skate i tok.

Em bin tok Kulim i bin tok orait tu long skelim narapela 10 pesen long 90 pesen sea bilong em long NBPOL i go long provinsel gavman bilong Wes Nu Briten.

Mista Skate i tok Provinsel Gavman bai i peim tasol kos long trense bilong ol sea na i no narapela samting moa.

Ol winmani bilong ol seaem Provinsel Gavman bai i skelim i go long ranim ol

wok na sevis i go long ol pipel olsem helt na edukesen na ol arapela sosel projek o sevis we Provinsel Gavman na ol NGO i ranim long provins.

Welpam i save pulim bikipela mani long Wes Nu Briten na i gutpela long ol profit i go long ol pipel bilong yusim long go hetim gutpela sindaun bilong ol.

Praim Minista Skate i tok Wes Nu Briten Provinsel Gavman i lukautim tupela trasti akaun na ol i wetim tasol ol dokumen bilong karimaut ol trense.

Gavana Jenerel bai i go pas long seremoni bilong kariamut trense bilong ol sea namel long Stet, Wes Nu Briten Provinsel Gavman na NBPOL.

## BRA/BIG laikim sekan na bel isi pasin

GRUP bilong BRA/BIG husat i bin stap long sekterel bung long Arawa las wik i tok sekan na bel isi pasin i mas kamap pastaim bipo long ol arapela wok kamap long Bogenvil nogut ol dona ejensi husat i sponserim ol restoresen wok i wok long westim nating taim na mani bilong ol.

Tupela mausman bilong BRA/BIG Andrew Miriki na Jonathan Ngati i bin tok pasin bilong sekan na kamapim bel isi em i masd stap olsem namba wan bipo long ol plen bilong go hetim ol wok i kamap.

Mista Ngati i bin tokim ol dona ejensi olsem ol bai i westim taim na mani bilong ol sapos sekan na bel isi pasin i no kamap pastaim long Bogenvil.

"Sindaun long graun i no gutpela. Ol sekan na bel isi pasin i no go gut tumas yet. Sapos ol samting i no stret, mani bilong yupela bai i lus nating," Mista Ngati i bin tok. Em bin askim ol dona ejensi long putim sampela mani bilong karimaut ol wok na progrem bilong sekan na bel isi pasin.

Ol dona ejensi husat i bin stap long dispela bung i bin gat long em grup we i tromoi bikipela mani tu long ol wok bilong stretim Bogenvil long kamapim gutpela sindaun em AusAID. Helpim grup bilong Nu Silan we i givim tu helpim long Bogenvil em long Nu Silan Ovasis Asistens i bin stap. Narapela tupela em Yunaitet Nesens Developmen Progrem (UNDP) na Yuropien Yunien.

Taim grup bilong ol BRA/BIG i laikim sekan na bel isi pasin long kamap pastaim bipo long ol arapela wok kamap long ailan, i gat ol sampela eria long provins husat i stretim sindaun pinis na ol i redi long go hetim ol wok developmen. Asisten Seketeri bilong Ikonmik sevis wantaim Bogenvil edministresen Patrick Koles i tok em i tru olsem sekan na bel isi i mas kamap long sampel; a hap bilong bikailan tasol long ol arapela hap tu bilong bikailan ol i redi long go hetim ol wok bilong kamapim mani.



• Ol pri skul sumatin bilong Lamusmus komyniti skul long Wes Kos Kavieng, Nu Ailan provins. Long lep han, Kennan Hugo, Thomas Michael na Jim Kasot. Ol i pinis skul long moning na long belo bek, ol i go raun long bus na pilai i stap i stap na wantok i panim ol. Poto Peter Maime.

## Salens long ol Bogenvil meri

BARBARA MASIKE i raitim

SALENS i go long ol meri Bogenvil long wok gut wantaim long helpim ol arapela susa, pikinini na brata bilong ol husat i stap longwe long bus na hait ples bilong kisim ol sevis.

Salens i go long ol meri lida husat i wok long ol liklik grup bilong ol tasol i luk olsem ol i no belgut na ol i pait long wanpela arapela bilong kisim mani long ol dona ejensi na tu, pait long luksave na sapot.

Minista bilong Woks wantaim Bogenvil Tresnsisenel Gavman Joe Pais i tokim ol meri olsem i stap insait long planti ol liklik grup na ol i no bihainim na yusim wanpela straksa i stap pinis long karimaut wok bilong ol.

"Yumi mas stretim straksa pastaim, rot i stap tasol yupela i no bihainim. Yupela i kamapim belkros namel long yupela yet. Mi salensim yupela long long ol liklik grup long wok bung gut wantaim," Mista Pais i bin tokim ol meri olsem.

Mista Pais i wokim dispela toktok long Bogenvil sekterel bung we i bin kamap long Arawa las wik.

Em bin tokim ol meri olsem ol meri bai no inap kisim wanpela gutpela sapot wantaim helpim mani i kam long gavman o ol dona ejensi inap ol i wok bung wantaim.

I gat tripela meri grup long provins long dispela taim husat i wok long traim kisim sevis aninit long wan wan netwok bilong ol.

Nem bilong ol em Bogenvil Inta sios grup we i gat membasip long ol bikipela sios long kantri olsem Katolik, Yunaitet, Seven de na Pentekostel Sios. Sista Lorraine Garasu i go pas long grup ya. Narapela grup em Bogenvil Wimens for Pis na Fridom we Josephine Sirivi em meri bilong BRA komanda Sam Kauona i go pas long en. Namba tri grup em ol lain bilong Provinsel Kaunsil ov Wimen we ol i memba long ol arapela (provinsel) meri grup insait long kantri. Theresa Jaintong i go pas long dispela grup.

Planti toktok i bin kamap tasol wanpela bikipela samting we ol i bin lukluk long en em wok long karimaut ol progrem bilong ol meri i no go gut bikos i nogat gutpela lain long go pas long en.

Long bung ol lida meri bilong wan grup i bin tokaut olsem long planti taim ol i aplai long ol projek na putim aplikesen bilong ol tasol ol i no save kisim mani long karimaut ol wok.

Ol bin luksave olsem strksa i stap olsem Mista Pais i tok tasol em i no wok gut bikos long planti taim, ol pablik sevan husat i go pas long dispela samting em ol i les long karimaut wok bilong ol. Ol i tok long dispela tasol na ol i fomim ol wan wan liklik grup bilong ol long traim kisim ol sevis olsem helt na edukesen i go long ol susa meri bilong ol.

Long bung bilong las Fraide, ol meri bilong ol wan wan grup i bin sindaun wantaim long fomim wanpela woking grup tasol ol bin brukim gen long bikos sampela meri i belhat na ol i lusim bung.



## Pater Antonine sevis lukautim ol lain tsunami brukim lek blong ol

OL PIKININI na ol bikman meri bilong Sissano, Warupu, Arop na Malol we tsunami i brukim lek bilong ol long Julai 17, i kism giaman lek bilong ol Pater Antonine sevis senta long Aitape i wokim.


Dairekta bilong Pater Antonine senta, Pater Leo Leonie OFM i tokim Wantok olsem ol wokman bilong senta i stat wokim pinis giaman lek bilong ol pikinini na manmeri long Mande bilong dispela wik.

Wantaim dispela giaman lek,

ol bai givim i go long moa long tenpela liklik mangi Krismas bilong ol i stap namel long 10 i go 12 na ol yangpela pikinini na ol bikman na meri.

Wanpela saveman bilong wokim ol giaman lek, Rajies Nanda na tupela saveman bilong Angau Memoriel haus sik i go helpim ol wokman bilong Pater Antonine Senta na wokim ol dispela giaman lek. Pater Leonie i tok ol i plen long pinis wokim ol giaman lek long foapela wik taim.

Em i tok tu olsem Karitas bilong Papua Niugini na Australia i tok promis long wokim wanpela haus slip bilong ol lain tsunami i brukim lek bilong ol. Karitas i promis tu long wokim haus bilong helpim ol lain i kism bagarap long tsunami, wanpela haus bilong ol nes, wanpela ia klinik na wanpela semen rot long wan wan haus i go long ol arapela haus Wantaim dispela rot, ol lain lek bilong ol i bruk inap yusim wil sia long i go kam long olgeta haus long senta.



• Wanpela simen tenk long Waipo ples insait long Malol eria i sanap yet maski tsunami i kam brukim ol haus na kilim ol manmeri na pikinini. Dispela em wanpela wara projek Aitape Katolik daosis i stat long wokim long Aitape bipo long Julai 17. Taim tsunami i pinis na i nogat gutpela wara bilong dring ol pipel bilong Waipo i strong long kism wara long dispela simen tenk.

## Edukesen Dipatmen bilong Luteran Sios i glasim wok bilong bihain taim

LEROY BATIA i raitim

NUPELA BOS bilong Edukesen Dipatmen bilong Luteran Sios long Papua Niugini, Taman Kim husat i kism dispela wok long April 1997, i kimapim ol nupela developmen straksa bilong wok insait long dipatmen bihainim astingting: 'Encouragement, Better Understanding and Meaningful contribution'. Long Tok Pisin yumi bai tok: Helpim narapela narapela, luksave gut long wari bilong narapela na givim gutpela sevis.

Mista Kim i tok ol i mas tokaut long dispela astingting long ol tisa na sumatin bilong Luteran Sios long olgeta hap bilong kantri. Em i tok inait long Sinod bilong Kimbe, em i bin presentim dispela straksa na ol hetman bilong Luteran Sios i tok orait pinis long bihainim. Insait long dispela straksa, olgeta wokman i gat toksave bilong wok bilong ol wan wan. Olsem husat i bosim ol na mak bilong wok bilong ol.

Mista Kim i tok dipatmen bilong em i bihainim mama lo bilong kantri aninit long edukesen, polisi, edukesen dairektiv prinsipel na developmen streteji. Em i i tok long dispela yia Luteran Sios i tok orait long dispela developmen plen na i luksave long

olgeta wok edukesen dipatmen i mekim insait long Sios.

Wanpela nupela samting Mista Kim i mekim tu em bilong givim nupela nem long Inglis Edukesen we Mathew Madani i bosim, Kristian Edukesen we Terry Isan i lukautim na Ples Laip na Tokples edukesen we Moses Mand i lukautim.

Em i tok namba wan tingting bilong Luteran Edukesen em bilong sapotim Kristen Edukesen. Namba tu em Tok Inglis Edukesen na Namba ri em Ples Laip na Tokples Edukesen.

Em i tok aidia bilong dispela plen em bilong givim gutpela skul bilong God long ol pikinini na long sait sait ol i ken kism skul bilong Tok Inglis Edukesen na Ples Laip na Tokples Edukesen.

Em i tok i gat planti ol buk bilong Kristen Edukesen tasol i mas i gat wanpela silabus bilong dispela program. Moa yet olgeta wok ol i mekim i mas bihainim Nesenel Edukesen plen we i glasim ol senis insait long edukesen nau i go inap long yia 2000 na bihain.

Mista Kim i tok aninit long ol dispela divisen ol i mas i gat taget o wanem samting ol i laik kemapim na i mas gat rot bilong bihainim o mekim bai dispela tingting i karim kaikai.

## Nesenel Kalsere Komisen promotim PNG kalsa

NESENEL KALSEREL Komisen i sapotim olgeta pasin bilong promotim Papua Niugini kalsa. Wanpela we bilong soim dispela tingting, em bilong stap insait long Papua Niugini Tred Fair bilong dispela yia long Sir Jon Guise stadium long Novemba 6 i go 8.

Insait long dispela tripela de so, Nesenel Kalsere Komisen bai soim pasin bilong wokim haus bilong ol hailens na

nambi, soim ol at na kraf wok bilong 33 atis bilong PNG, singautim ol kalsere grup long putim ol singsing bilong ol, na singautim ol string ben grup bilong Is Niu Briten na Sentrel Provins long singsing long dispela so.

Papua Niugini Manufeksera Kaunsel i singautim Nesenel Kalsere Komisen long tek pat long dispela so na i givim K5000 long Nesenel Kalsere Komisen. Long makim maus bilong PNG Manufeksera Kaunsel, Keryn Laphorne i tok, ol i amams long lukim pipel bilong PNG i wokim PNG prodak na salim ovasis. Long dispela as, ol i singautim Nesenel Kalsere Komisen long tek pat tu long dispela tred fair o so bai ol i ken ogenaisim ol lokol pipel long promotim lokol prodak.

Dairekta bilong Nesenel Kalsere Komisen, Dokta Jacob Simet i givim bikpela tok tenkyu long PNG Manufeksera Kaunsel long helpim ol wantaim K5000 na i tok dispela em i namba tu taim

bilong ol long tek pat long kain so.

Dokta Simet i tok, bipo planti ol so i save yusim ol singsing tumbuna na kalsa bilong PNG olsem pasin bilong pulim ol manmeri na pikinini i go lukim so. Taim so i stat ol i save larim ol singsing grup i go danis long sait na givim moa taim long ol arapela ektiviti.

Tasol em i tok, dispela pasin i no stret. PNG i mas luksave na givim namba wan ples long olgeta pasin tumbuna, at na kraf, singsing string ben, ol singsing tumbuna na ol arapela pasin tumbuna. Em i tok dispela em i as tinting tru bilong Nesenel Kalsere Komisen long go pas long dispela Tred Fair.

Sapos yu gat wanpela Kalsere grup o singsing grup na yu laik tek pat long kain ol so olsem tasol yu no save long rot bilong mekim, orait rait i go long Dairekta, Nesenel Kalsere Komisen, P.O. Box 7144 Boroko, NCD Papua New Guinea o ringim ol long, Telepon: 323 5111/301 2000 na Feksimil: 325 9119.

# Teknikel stadi bilong Ramu nikel main i pinis

WENCESLAUS MAGUN i raitim

OLGETA teknikel stadi bilong Ramu nikel main long Madang provins i pinis, ripot bilong pinis bilong mun Septemba 1998 i kam long Hailens Pasifik i tok.

Menesing Dairekta bilong Hailens Pasifik, Ian Holzberger i bilip wanpela kampani Fluor Daniel na HA Simons bai pinisim wok stadi long stat bilong mun Novemba na bai givim dispela ripot i go

long ol kampani i wok bung wantaim Hailens Pasifik long dispela projek.

Em i tok ol toktok bilong painim mani bilong statim dispela projek bai bihainim dispela stadi ripot.

Mista Holzberger i tok tu olsem dispela ripot bai helpim tu toktok namel long ol lokol gavman, provinsel gavman na nesenel gavman.

Em i laikim olgeta pati i mas wok bung wantaim long sapotim wok bilong kirapim

dispela projek.

Em i tok, long Julai wok bilong digim Ramu na kism graun bilong testim i pinis. Dispela i givim inap taim bilong kampani long painim aut amas nikel na ol arapela minerel i stap long graun.


Insait long dispela wok painim ol i luksave olsem Ramu i gat 1.01 pe sen nikel na .10 pe sen kobat. Dispela wok painim i soim tu olsem i gat samting olsem 72 milion ton antap long 52 ton we ripot bilong pastaim i soim.

# WANTED: "THE TIKTOK GANG"

The Taste of Paradise



3 NEW TASTY FLAVOURS ON THE RUN



REWARD: "GREAT TASTING BISCUIT"

## Mumeng bai lukautim 1999 Karismatik rali



• Sampela Karismatik mama long Bulolo na Mumeng i sanap wantaim Korona bilong ol long taim bilong kisim skul. Foto: Tim Kaitok

### TIM KATIOK i raitim

MOA LONG 600 manmeri pikinini bilong Bulolo na Mumeng i bin bung wantaim insait long tri de Karismatik riniuel bilong ol long Bulolo stat long Oktoba 11 i go pinis long Oktoba 14.

Wanpela mausman bilong dispela rali, Ken Charles bilong Wewak i bin go pas long dispela rali.

Astingting bilong dispela rali

em bilong kirapim paia bilong Holi Spirit insait long wan wan manmeri na pikinini i bung insait long dispela rali. Na larim Holi Spirit i karim kaikai long laip bilong ol.

Rali i bin kamap gut tru. Long moning ol i kisim skul o semina na long nait ol i stap insait long felosip. Rali i bin pinis wantaim bikpela amamas.

Planti arapela sios i bin stap tu long dispela rali. Planti manmeri na pikinini i givim laip bilong

ol long Papa God na tu sampela mirake i bin kamap.

Ol kimiti bilong rali i makim Mumeng olsem ol lain husat bai go pas long lukautim rali bilong yia 1999. Dispela rali bai kamap long mun Me. Ol komiti i bilip olsem dispela rali bai bungim ol pipel bilong Lae, Bulolo, Wau, Wewak na ol lain bilong Mumeng yet.

Nau yet ol Katolik Karismatik grup bilong Mumeng i mekim planti fundresing bilong lukautim dispela rali.

## Karkar distrik na Madang distrik bilong Luteran Sios i bung

### PAULUS TALI i raitim

OL HETMAN bilong Luteran Sios long Madang i amamas long lukim pasin bilong wok bung i karim kaikai namel long Karkar distrik na Madang distrik bilong Luteran Sios taim dispela tupela distrik i bung wantaim long holim wan wik konferens bilong ol pasto long Bunabun long las mun.

Karkar Distrik i bin lusim Madang distrik inap 11-pela yia olgeta, na wok i no kamap gut. Long dispela as, presiden bilong Madang distrik, Reveren Francis Ambuk i askim olgeta pasto bilong Karkar na Madang long kamap long dispela konferens na tokaut long ol gutpela wok na hevi bilong ol.

Rev Ambuk i salensim ol pasto long sanap strong na bihainim stret skul ol i lainim long skul bilong kamap pasto na autim stret skul bilong God bihainim ol tingting bilong Luteran Sios. Em i tok tu olsem planti ol pasto i no bihainim stret lituji bilong Luteran Sios.

Em i tokim ol pasto long i noken i gat tupela tingting taim ol i autim tok bilong God. Em i tokim ol long sanap strong, noken surik, go pas long

karim kruse bilong Jisas Krais na winim ol manmeri na pikinini i lus pinis.

Reveren Ambuk i askim ol pasto long daunim ol yet na karim wok bilong Krais. Em i tokim ol pasto long long mekim gut wok bilong kaunseling. Samting olsem 70 pasto bilong Karkar na Madang distrik i bin kamap long dispela konferens.

Wanpela saveman bilong Evanjelikal Luteran Sios bilong PNG, Pasto Yabo Sabo i skulim ol pasto long histori bilong Luteran Sios. Em i tok pasin bilong bruk i no gutpela.

"Bipo wok i stap, yumi mas stap olsem. Noken ting yu gat inap strong bilong sanap bilong yu yet," Pasto Sabo i tok.

Em i tokim ol pasto long karim tru wok na mekim gut wok bilong ol bai ol i ken helpim tru ol pipel bilong God. Insait long Konferens, ol pasto i tok tok moa long:

- Lituji;
- Prea;
- Kaunseling;
- Riniuel bilong Luteran; na
- Wok Edministresen.

Ol pasto i givim bikpela tok tenkyu i go long ol pipel bilong Bunabun long redim gut ples bilong konferens.

## Ol meri askim Holi Spirit kam insait long laip bilong ol

LONG Katolik bilip, na tu long ol arapela sios insait long kantri na wol, dispela yia (1998) em yia bilong Holi Spirit bilong Papa God long mekim wok bilong God. Planti manmeri long Papua Niugini i wok long tanim bel na givim ol yet long God.

Wankain tasol, dispela poto i soim ol meri bilong ples Surumba long Hawain Katolik peris insait long Is Sepik provins bihain long ol i mekim penens long tripela de. Taim ol i mekim penens ol i askim God long pogivim ol sin na rong bilong ol na pulumapim ol long Holi Spirit long mekim wok bilong em.

Planti bilong ol dispela lain meri i bin kisim presen bilong Holi Spirit long dispela taim.



## PASIN BILONG GIVIM YU YET

OL I TOK long wanpela naispela misis tru. Em i gat olgeta kain samting: olgeta kain naispela klos, na naispela haus, na naispela bilas gol, na naispela spot ka.

Tasol man bilong em i rausim em, long wanem, em i les long oltaim baim olkain bilas bilong misis ya. Nau misis i wanpis na em i belpas tru. Yes, em i gat olgeta kain naispela samting, tasol hat na bel bilong em i emti. Olsem na nau em i go lukim dokta i save stretim ol pipel i gat ol bikpela wari....

Misis ya i autim stori bilong em long dokta na dokta i tokim em olsem: "Yu kam wantaim mi. Mi laik yu mas lukim wokmeri bilong mi, husat i save klinim ol opis. Ating em inap stretim sik na wari bilong yu.

Orait, nau tupela meri ya i sindaun na wokmeri i autim stori bilong laip bilong em. Em i stori

olsem: "Pastaim man bilong mi i dai; na bihain liklik, wanpela ka i kilim indai pikinini man bilong mi. Nau mi stap wanpis olgeta. Mi painim wok, tasol laip bilong mi i bagarap pinis. Mi no inap kaikai, no inap slip, no inap smail. Mi laikim pinisim laip bilong mi na dai....

"Tasol wanpela de long apinun long taim mi wokabaut i kam bek long haus, wanpela tarangu liklik pusi i bihainim mi. Mi larim em i kam insait long haus na givim liklik plet, susu long em. Bihain em i dringim susu pinis, em i klinim plet long tang, na klinim olgeta gras bilong em long tang, na em i kam na rabim bodi bilong em long lek bilong mi. Mi pilim na mi smail....em namba wan taim insait long tripela mun. Nau mi litimapim pusi-na holim em tait....na wanpela tingting i kamap long mi: "Yu smail


nau bikos yu bin helpim wanpela liklik pusi. Ating yu inap smail moa, sapos yu go aut na helpim ol pipel nabaut."

"Olsem na long neks de mi kukim sampela bisket na bringim i go long wanpela lapun meri i sik na i slip long bet. Na long de bihain mi painim wanpela narapela tarangu mi inap helpim. Mi mekim olsem i go i go...na nau em i pasin bilong mi...na dispela i mekim mi hepi....bikos ol nau i hepi.

"Sapos yu laik hepi, yu mas goaut na helpim ol arapela pipel. Mi bin mekim olsem na nau mi hepi tru tru. Tude mi no gat wanpela wari, na mi save slip olsem pikinini pusi."

Taim misis i harim dispela stori, em i krai. Em i gat ol kain samting, tasol em i sot long wanpela samting: em i no hepi. Na mani i no

### TU MINIT TINGTING



FRANK MIHALIC i raitim

inap baim pasin hepi. Bilong kamap hepi em i mas skul long givim em yet long ol arapela pipel.

Dispela wankain marasin inap helpim yumi tu. Sapos yu pilim sik liklik, orait, yu go visitim haus sik we bai yu lukim olkain bikpela sik

na pen... na nau yu pilim mobeta liklik. Sapos yu laik givap, orait, yu go, sindaun na harim ol wari bilong ol wantok, na bai bel bilong yu i tenkyu long God, long wanem, ol wari bilong yu i liklik nating.

Ol i tok long wanpela man i komplem long em i no gat su. Bihain liklik em i painim wanpela man i no gat fut olgeta. Nau man ya i tenkyu long God long tupela gutpela fut bilong em. Em nau!

Sampela taim yumi wok long stretim wari bilong wanpela man o meri na tok stia bilong yumi i tanim bek na i sutim bel bilong yumi yet. Olgeta taim yumi pulim man/meri i kam antap, yumi yet i save go antap wantaim.

Olsem Jisas i tok long Luk 6:38 - "Yupela mas givim ol samting long ol narapela, bai God i givim ol samting long yupela. Em bai skelim gutpela moa long yupela, na em bai pulapim tru, na sakim i go daun, inap long samting i kapsait....na givim long yupela."

## Gutpela pasin tumbuna bilong yumi i ken helpim yumi olsem wanem nau

PASTAIM mi laik tok liklik long dispela piksa bilong bilum na wanem as na mi putim piksa bilong bilum, olsem mak bilong ol toktok bai mi raitim karnap long *Wantok Niuspepa*.

Bilum em i wanpela gutpela samting bilong tumbuna bipo na nau yumi holim yet dispela samting na em i save helpim yumi gut tumas.

Em i gutpela long lukim ol meri long PNG i no lusim pasin tumbuna na ol i save wokim ol bilum na yusim ol long kainkain rot i stap nau.

Taim yumi lukim bilum, yumi save em i samting bilong ol mama bilong yumi. Ol mama i save mekim bilum long han bilong ol yet na ol i save mekim kainkain wok long en.

Sampela bikipela na nambawan wok, ol mama long PNG i save mekim long bilum em long pulamapim ol pikinini na tu long karim ol kaikai long gaden i kam long haus long helpim ol famili memba i stap long haus.

Ol mama i save yusim bilum long planti arapela wok tu. Olsem na nau yumi olgeta i save bilum em i wanpela gutpela samting bilong PNG stret, ol papamama na tumbuna i holim bilum long taim bipo na yumi i no lusim pasin bilong wokim bilum na yusim bilum.

Nau yet bai yumi lukim ol mama i wokim kainkain bilum wantaim kainkain bilas na stail bilong kisim moni na mekim arapela wok long en. Olsem na nau yumi save na amamas olsem bilum em i samting bilong tumbuna tasol yumi holim yet dispela samting na em i save helpim sindaun bilong yumi tu.


Mi bai raitim sampela tok i go long *Wantok Niuspepa* aninit long dispela nem o het tok bilum.

Insait long bilum yumi i no save karim wanpela kain kaikai tasol. Nogat. Yumi save karim planti kain kaikai bilong helpim yumi. Wankain tasol bai mi raitim kain tok aninit long ol kainkain topik.

Insait long dispela yia, 1998 mi wok long harim na ritim olsem sampela lida manmeri long kantri bilong yumi i stat long toktok nau long holim pas ol gutpela tumbuna pasin na daunim ol hevi i bungim yumi nau olsem lo na oda i bagarap.

Sampela lida manmeri i go het yet na kamapim pasin tumbuna long provins bilong ol soim na strongim ol pikinini na yangpela long ol i mas biahinim pasin tumbuna i gutpela long

## TOK I GO PAS



sindaun bilong ol.

Mi amamas tu long lukim ol sios grup i kirapim tingting bilong ol yangpela manmeri i mas holim pas ol gutpela pasin tumbuna bilong ol long yut konfrens na long kainkain bung bilong sios.

I tru planti pasin tumbuna bilong yumi i no gutpela olsem na ol pikinini i no mas lainim ol dispela pasin nogut. Tasol ol gutpela pasin tumbuna bilong helpim yumi em yumi mas lainim na strongim insait long laip na sindaun bilong yumi.

Na em yumi man save olsem yumi long PNG, yumi i no inap painim o lukim wankain pasin tumbuna i stap long PNG bilong yumi lainim long en. Olsem na yumi mas skelim gut olgeta pasin tumbuna long wanwan hap bilong yumi yet pastaim.

Olsem tok piksa: Long ples bilong mi, mipela i gat wanpela tumbuna pasin bilong rispek i stap em olsem, taim bikman i sindaun long wanpela hap ol manmeri, pikinini i noken i go kam long baksait o pes bilong em.

Na tu olgeta pikinini bilong wanpela meri i no inap go kam long pes o baksait bilong kandere bilong ol em i brata bilong mama bilong ol. Em i strongpela mak bilong rispek ol pikinini i save lainim na dispela gutpela pasin i stap yet nau na ol pikinini i lainim na dispela i helpim ol long soim rispek bilong ol i go long ol tisa bilong ol long skul, mamapapa long haus bilong ol na arapela lida olsem elda na politisen. Kain pikinini olsem em ol i gutpela na painim hat tru long stilim ol arapela samting bilong ol manmeri na mekim pasin nogut.

Olsem na sapos yumi lida na ol mamapapa long PNG i laik ol pikinini i kamap gutpela manmeri biahin yumi mas mekim sampela wok long painim rot bilong dispela i ken kamap.

## Mendi bai i gat nupela 7 stori provinsel het kwata



• Papa bilong Plante na Asosiet Akitekta kampani, Geoffrey Plante i soim ol pipol bilong Sauten Hailens piksa bilong nupela seven stori haus bilong provinsel gavman bilong ol. Mista Plante i givim dispela piksa long Gavena bilong Sauten Hailens, Anderson Agiru long Mendi long las wik Fraide. Foto: Wenceslaus Magun i kisim long Mendi.

### WENCESLAUS MAGUN i raitim

SAMTING olsem 300,000 pipol bilong Sauten Hailens nau bai gat wanpela nupela provinsel het kwata opis i sanap long kos bilong K10 milion na bai i gat sevenpela stori long dispela nupela haus long Mendi taun.

Chevron na ol join vensa bilong em i amamas wantaim gavman bilong Sauntan Hailens na ol pipol bilong Sauten Hailens long Mendi las wik Fraide taim ol brukim graun bilong wokim dispela seven stori haus olsem provinsel het kwata opis.

Jeneral Menesa bilong Chevron, Royce Elliot i tok kampani bilong em i amamas tru long putim K10 milion aninit long takis kredit skim bilong wokim dispela

provinsel het kwata. Em i tok i luk olsem ol kampani i wokim dispela haus bai kisim 13 krismas long pinisim olgeta wok. I luk olsem olgeta wok bilong dispela haus bai pinis long Novemba 1999.

Mista Elliot i tok dispela opis bai i gat wok haus bilong Gavena, Deputi Gavena, ol top gavman wokman, provinsel asembli hol na provinsel eksekutiv kaunsel semba.

Em i tok dispela haus bai kisim pawa long Mendi taun na long wankain taim bai i gat wanpela jenereta bilong em yet bilong wok taim pawa bilong taun i stop long wok. Bai i gat wara saplai bilong em yet na toilet long dispela haus.

Aninit long takis kredit skim, Chevron i putim K4 milion long wokim Kikori Hai Skul, K5 milion long wokim Samberigi rot, K10.3

milion long wokim Homa-Paua rot na sampela ol helt na edukesen sevis insait long Sauntan Hailens na Gulf provins.

Em i tokim ol pipol bilong Sauten Hailens long tingim ol kampani i wok long Kutubu, Gobe, na Mora wel na gavman bilong PNG taim ol i lukim dispela seven stori haus i sanap.

Gavana bilong Sauten Hailens, Anderson Agiru i givim strongpela tok lukaut i go long ol pipol bilong em long lukautim dispela nupela seven stori haus ol bai i gat. Em i tok long Novemba 11, 1997, sampela man riogut i kukim provinsel het kwata bilong ol. Dispela i bagarapim histori bilong ol na ol arapela riopot ol i gat. Olsem na em i no laik lukim ol pipol bilong Sauten Hailens i mekim wankain pasin olsem long dispela nupela het kwata haus bilong ol.

## Ol hailans yut i laik go bek long ples

OL sampela yangpela manmeri bilong hailans provins long Mosbi i les nau long stap long Mosbi na i laik go bek long asples bilong ol.

Ol hailans yut manmeri long 2 Mail Hil long Mosbi i mekim plen long stat wokabaut long Mosbi i go long Popondeta na kisim sip i go long Lae. Long Lae ol bai kisim PMV na go antap long ples bilong ol wanwan.

Bikipela as ol yangpela ya i les long Mosbi siti na i laik go bek em bikos long bikipela senis long planti samting insait long Mosbi siti. Ol samting olsem prais bilong ol kaikai na samting i go antap, planti raskel pasin tumas long siti, nogat wok, pasin bilong bagarapim ol meri na pamuk pasin i kamap planti, planti manmeri i wok long pulap na raun nating siti na laip bilong siti i go antap tumas we ol manmeri i save kisim bikipela mani tasol i ken stap.

Dispela wokabaut bilong ol yangpela long 2 Mail Hil bai kamap long pinis bilong dispela mun Novemba.



• Ol hailans yut manmeri long 2 Mail Hil long Mosbi i bung wantaim na pasim tingting long go bek long asples bilong ol.

Planti i tok ol i laik go bek long ples na sindaun isi na stap gut long isi laip bilong ples na mekim wok bilong ol long graun bilong ol.

Long dispela taim nau, ol i wok long pusim wilbaro raun long bungim liklik mani bilong baim ol kaikai na samting bilong karim na wokabaut i go long Popondeta, baim sip long Popondeta i go long Lae na

baim PMV i go antap long hailans haiwe.

Ol i askim tu ol bisnis na kampani long helpim ol wantaim sampela kain sponsa long ol samting we inap helpim ol long dispela wokabaut bilong ol.

Kakaruk kampani, Zenag Chicken i givim ol sampela siot bilong werim.

## Ol wokman long Aitape bagarap askim long pe

### BEN TAUMAI i raitim

OL sampela volentia wokman husat save helpim long lodim na rausim ol kago long helikopta wantaim ol narapela lain long sentrel bakstua bilong disasta opis long Aitape bin holim 2 aua stop wok long Tunde moning dispela wik.

As bilong dispela em bikos ol i no bin kisim ol alowens bilong ol long wok ol bin mekim long stat bilong tsunami haiwara we bin kilim moa long 2,000 man na meri.

Dispela stop wok ya bin mekim wanpela man bilong helikopta long go long Sissano long kisim siaman bilong Katolik Sios. Rihabilitesen Komiti Tas Maketu na *Post Courier* niusman Wally Hiambhon husat mas kam stap insait long distrik disasta komiti.

Taim ol dispela ol volentia wokman i bungim distrik kodineta bilong disasta long Aitape Lumi Dickson Dalle ausait long distrik ofis na tokim em long hevi bilong ol, em tokim ol olsem em bringim olgeta. Pepa bilong ol i go stap long opis bilong Praim Minista pinis we siaman bilong PM's trast Fan Bernard Cholai i lukluk long em na stretim.

Em i tok, ol givim tok orait pinis long stretim tasol ol wok long lukluk na stretim gut husat ol man o meri tru, i mekim wok. As bilong dispela em bikos i gat

planti ol nem tru na ol no save husat i mekim wok tru na husat i nogat.

"Taim ol stretim dispela pinis bai ol peim yupela, tasol long wanem taim em mi no save. Tasol mi tokim yupela stret olsem bai yupela bai kisim yet."

"Ol pablik sevan em mi no klia, bai ol kisim peim o alowens o nogat em mi no klia," Dalle tokim volentia.

Dispela hevi bilong alowens em bikipela tru we planti ol pablik sevan long Sandaun na Is Sepik husat bin helpim i no kisim. Planti ol opisa long Aitape i no wanbel tumas long dispela longpela taim ofis bilong NDES na PM i no stretim kwik dispela hevi.

Ol laikim olsem olgeta dispela hevi ya em ol mas stretim pastaim orait biahin go insait long namba 2 wok.

Ol peris kaunsel bilong Pes Katolik Misen i no wanbel tumas long Katolik Ash Diosese long Aitape long peim Pes Sab-helt Senta K750 long yusim ambulens bilong ol long namba wan dei bilong disasta i kam inap yau.

Em bikos ol tok dispela mani em liklik tumas long namba bilong ol de ol yusim i kam inap nau. Ol laikim olsem Katolik sios i mas peim ol K21,250 olgeta long 4-pela mun ol yusim dispela ambulens.

Peris Kaunsel namba tu siaman Andrew Tutu i tok olsem dispela ambulens i no bilong Katolik Sios, nogat em bilong Pes Sab-helt Senta we komyuniti bilong Pes i papa na mama long en.

# SBDC HELPIM YU WANTAIM OL LIKLIK WOK BISNIS



Inap mipela i sevim yu wantaim gavman?

PIPEI na ol bisnis i ken helpim gavman long sampela taim na gavman i peim intres long mani em i yusim. Ol i kolim dispela kain invesmen long "gavman sekyuriti".

Long taim we ol i makim i ova, gavman i save peim bek mani we em i dinau long en wantaim intres antap long en.

Dispela em gupela kain invesmen bikos ol investa i save olsem ol bai i kisim bek mani bilong ol.

Dispela em i wanpela seif rot long wokim invesmen. Ol beng i painaut olsem dispela em i gupela rot long investim ekstra mani.

**Dinaulm mani**

Yumi lukim pinis olsem ol pipel i gat mani i ken dinaulm tasol pastaim ol i mas wokim ol bikpela disisen. Kain olsem wanem ogenaísesen ol bai dinaulm mani long ol. Taim ol i

wokim disisen ol samting olsem bai i stiaim ol:

- Profit o winmani we mani bilong ol bai kamapim
- Sans long lusim mani bilong ol we ol i investim.

Ol lain husat i laik kisim dinau mani i mas mekim ol bikpela disisen tu.

**Wanem rot bai yumi bihainim taim yumi laik kisim dinau mani?**

Kos bilong kisim dinau mani bai i stiaim disisen bilong man long taim em i laik kisim dinau mani.

Ol ogenaísesen we ol man i laik kisim dinau mani long en bai i no planti tumas.

Ogenaísesen bai i salim dinau mani i go long ol pipel sapos em i save olsem ol bai i peim bek dinau bilong ol.

Bikpela samting namel long man i laik kisim dinau mani na ogenaísesen we i laik givim dinau mani em sekyuriti.

Sekyuriti em dispela samting we i gat velu long en man i laik kisim dinau i givim long grup em i dinau long em.

As tingting long kisim sekyuriti em sapos man i no peim dinau bilong em.

Sapos olsem, ogenaísesen we i givim dinau mani i ken kisim dispela samting i gat velu long en na salim bilong kisim bek mani.

Tok piksa em sapos wanpela papa bilong stoa i laik kisim dinau mani long bain wanpela deliveri trak, em i ken givim ol pepa we i gat ol dokumen long onasip bilong stoa i go long beng we em i kisim dinau mani long en.

Sapos man i stretim bek dinau mani insait long taim ol i makim long en, beng bai i givim bek ol dokumen pepa bilong stoa long papa bilong em.

Tasol sapos em i no peim bek dinau mani long taim beng i makim long en, beng bai i salim stoa na kipim inap mani bilong kamapim dinau mani we man i no bekim yet wantaim intres.

Sampela ogenaísesen bai i givim dinau mani wantaim nogat sekyuriti long en.

Long dispela, ol bai i sasim bikpela intres.

Tasol sapos man i laik kisim dinau mani ina i givim sekyuriti, em bai i isi long en long kisim lonmani na tu em bai peim liklik intres long en.

Wantaim ol dispela long tingting bilong yumi, bai yumi lukluk long sampela rot long kisim dinau mani long PNG.

*Moa long neks wik*

**TOK SORI**

Ripot bilong kopra prais long las wik *Wantok* nuispepa Fonde Oktoba 29, 1998 long pes 10 i no tru. *Wantok* i tok sori long dispela ripot.

# Papua Niugini Fores Prodaks i gat wokas yunien opis

**ARI GUH DANDEE i raitim**

PAPUA NIUGINI Fores Prodaks Wokas Yunien insait long Bulolo i bin kisim bikpela tok amamas i kamap long Maus bilong Minista bilong Emploimen na Yut, Mista Mathias Karani long open bilong nupela opis bilong ol insait long Bulolo long Tunde Oktoba 28, 1998.

Mathias Karani husat i bin makim Gavman na olsem Minista i bin openim dispela nupela opis bilong PNGFP wokas yunien wantaim ol arapela ol bikpela manmeri long luksave long dispela nupela opis.

Long makim maus bilong Gavman Mathias Karani i tokim klostu 2,000 manmeri na ol wokman long i mas wok long wantaim ol eksekutiv na ol man i go pas long dispela wok, bilong helpim ol long taim ol i bungim hevi insait long wok bilong ol.

Em i askim tu ol narapela wokmanmeri long sait bilong Gavman na ol praivet bisnis tu long i ken joinim dispela PNGFP wokas yunien, bikos dispela yunien i kam bilong helpim olgeta kainkain wokmanmeri na i n bilong ol wokmanmeri bilong PNGFP tasol. Em i gat bikpela amamas tru long lukim olsem dispela kain opis i bin kamap bilong helpim ol wokman husat i wok long sait bilong ol praivet

sekta na long gavman insait long Bulolo distrik, bilong sevim ol wantaim wanem laik na stretim ol hevi bilong ol.

Em i tansim ol wokmanmeri insait long Bulolo distrik we i kamapim 5-pela lokol gavman kaunsol eria, long Watut, Mumeng, Wau Bulolo taun. Wau lokol na Waria long i mas joinim ol kain wokas Yunien olsem bilong helpim ol na noken mekim nabaut samting long laik na strong bilong ol yet.

Long soim bikpela amamas na tok tenkyu bilong em Minista Karani i bin givim K1,000 olsem poket mani bilong em i go long Yunien long helpim long kirapim na strongim wok insait long Bulolo distrik.

Dispela tu em i namba wan taim bilong kain yunien olsem i bin kamap insait long Bulolo distrik wei ol i wok long traim long kamapim planti taim pinis tasol i nogat gupela opis spes long mekim wok.

Dispela em i bikpela samting tru, na planti ol pipel ol wokmanmeri bilong Wau na Bulolo nau i gat opis bilong ol pinis.

Yunien i gat bikpela wok bilong mekim tru na i gat gupela luksave na gupela wobung wantaim mas kam long ol yunien nambas ol kampani na long ol gavman bilong mekim gupela wok kamap.

# ELA MOTORS OL TAIA NA BATERI


I gat planti ol kwaliti Hankook, Michehine na Sumo Taia wantaim Ela Power Bateri Bilong ol kain kain model kar.

Ol hevi dutina strongpela kwaliti taia inap winim kain kain rot long PNG, i stap long gupela prais.

Kain kain sais Ela Motors pawa Bateri i redi tasol long kar bilong yu. I gat 12 mum ful waranti tu long olgeta Ela Motors Pawa Bateri.


**YU INAP PAINIM LONG OLGETA ELA MOTORS PARTS DIPATMEN NA TYRE BAY LONG KANTRI.**

**Ela Motors**  
TYRES & BATTERIES



**SUMO LUG 5T 388**

- Spesel tred inap winim planti mail.
- Moa lagi helpim taia i ron gut long rot.
- I gat planti spes we win i raun na taia i no inap hat tumas.
- Strongpela kasing long helpim sefti na moa ritred.



**SUMO TRACTION 888**

- Em inap winim graun malmalum na ol nogut.
- Em i brait na inap holim gut kar.
- Spesel nailon rop i strongim taia i stap longpela taim.



**HARIAP NA RINIM MIPELA NAU**

HEAD OFFICE 3229494 • PORT MORESBY 3229414 • LAE 4722322 • RABAU 9821988 • KOKOPO 9829100 • MADANG 8522188  
GOROKA 7321844 • MT HAGEN 5421888 • WEWAK 8562255 • KAVIENG 9842132 • KIMBE 9835155 • TABUBIL 5489060  
VANIMO 8571254 • PORGERA 5479367 • KUTUBU 5496685 • BUKA 9839915 • LIHIR 9864099 • ALOTAU 6410100



# Lae Niuis

## Morobe plis holim pasim stilman

PLIS long Morobe provins i holim pasim wanpela stilman wantaim wanpela strongpela gan long Mande moning.

Bung opresen bilong ol Wau, Bjulolo na Mumeng plis i kisim stori olsem ol stilman i laik rausim ol strongpela gan i go olsem long Lae siti.

Olsem na ol i bin wokim rot blok long Mande monging long ples Gabensis we ol i holim pasim wanpela stilman wantaim wanpela gan M16 na 4-pela Banana Megesin.

Wanwan long ol dispela 4-pela megesin i gat samting olsem 30 rauns bilong ammnisen (katres).

Provinsel Plis Komanda Joe Samara i tok olsem ol pawa gan em ol i bin yusim long bagarapim Wau na Bulolo taun long las mun na stilman mani.

Em i tok ol i no sasim sampela man pinis tasol ol i gat inap stori long ol dispela stilman. Olsem na ol plis i wokbung wantaim long holim pasim ol.

"Wanpela long ol dispela stilman em ol lain bilong mi i holim pas pinis wantaim pawa gan. Na sampela bai mipela kisim klostu mipela i gat stori pinis," PPC i tok.

Em i tok tu olsem em i bilip dispela stilman em bilong ples Garaina insait long Morobe provins.

Em tu i tok tenkyu i go long ol lain bilong Morobe provins long i nogat sampela bikipela hevi insait long 1998 Morobe So.

"Mi amamas na tok tenkyu long ol lain Morobe yet long wanem i nogat sampela asua ra ol i lukautim ol yet na harim tok bilong mi long noken wokim trabel," Mista Samara i tok.

Em tu i mekim strongpela tok lukaut i go long ol pablik olsem sapos ol i lukim ol sampela stilman o ka, ol i mas toksave hariap long plis.

Em i tok noken haitim na larim i sap, nogut ol yet i painim birua.



• Agrikalsa na Laivstok minista Tukape Masani na Lae memba Bart Philemon i lukluk raun long ol singsing grup long Morobe so.

# Wau famas bekim K49,000. bilong beng

### ARI GUH DANDEE i raitim

AGRIKALSA Beng bilong Papua Niugini i gat bikipela amamas long ol Wau fama taim ol i bin bekim K49,000.00 olsem dinau mani bilong ol i go bek long benk insait long wanpela bikipela bung bilong ol fama long Wandumi ples long Wau long las wik Tunde.

Dispela bung bilong ol fama long Wau i bin pulim laik na tingting bilong memba bilong Lae open Bart Philemon long i kam na stap insait long dispela de bilong bekim bek dinau mani bilong Agrikalsa Benk.

Bart Phillimon i bin lukim dispela bikipela mani na wok we ol fama bilong Wau i bin mekim na em i gat bikipela bel kirapim tru na em i sapatim tingting bilong kirapim ol wok fama insait long Wau na Morobe long i mas i stap strong.

Long lukluk bilong Bart Phillimon olsem wanpela politikol lida insait long Morobe em i go bikipela sapat bilong em i stap bihain long ol wok fama. Tasol em i laikim olsem olgeta lida bilong Morobe yet i mas i gat wantaim tingting we em i gat bai olgeta i ken sanap bung wantaim na strongim wok fama insait long Morobe provins.

Wok fama insait long provins na kantri er. wanpela bikipela samting tru long laip na sindaun bilong ol wanwan Papua Niugini manmeri na Gavman i mas sapatim na strongim moa yet, bilong helpim ol pipel bilong ples long kamapim mani bilong ol yet long helpim sindaun na developim ples na kantri tu.

I luk olsem Papua Niugini i gat planti ol save manmeri tru insait long kantri we planti i nogat mani i wok pait tasol mi tingting sapos Gavman i kirapim kain program olsem i luk olsem, planti ol pipel husat i stap nat-



• Ol sampela yangpela boi husat i amamas na raun long Morobe so las wiken.

ing long taun na ol siti bai i go bek long ples long kamap fama man o meri long ol yet, Mista Philemon i tok.

Mista Philemon yet i bin lukim dispela bikipela bung long Wau na em i gat bikipela bel kirapim tru long kamap olsem wanpela fama bihain sapos em i lusim politiks.

Agrikalsa Benk bilong Papua Niugini i bin givim dispela mani i go long han bilong SRPM (Smol Bisnis Projek Menesmen) olsem wanpela liklik han kampani aninit long benk long karimaut ol ekstensen wok program na helpim ol pipel long kirapim ol wok wantaim displa dinau mani.

SRPM long Wau i bin wok hat insait long Wau long traim na helpim ol fama long ol ples na dispela i givim piksa olsem wok bilong SRPM

em i namba wan tru na i gat kaikai bilong em we planti ol fama i gat amamas long wok bilong ol.

SRPM i bin kisim K29,000.00 na i bin givimaut long kirapim 5-pela kopi plentesen, 5 kau fam, 7-pela liklik kopi plentesen insait long ples na tupela haus kakaruk.

Bos bilong SRPM long Wau Lucas Kindiwa i tok em i gat bikipela amamas tru long dispela 47 fama husat i bin wok hat tru long bekim dinau bilong ol, tasol em i salensim ol i no ken les nabaut long mekim wok. Em i tok yupela i mas mekim wokstrong long kamapim kaikai bilong wok bilong yupela. Maski kamap olsem waitman hariap.

Em i tok SRPM i kamapim planti ol gutpela wok program bilong em na SRPM em bilong helpim ol pipel

bilong ples long kamap ol fama ol yet na ol pipel i mas luksave long SRPM nau na wok bung wantaim ol.

Smol Rurel Projek Menesmen em Morobe Dipatmen i bin kirapim wok program bilong em long yia 1996 long mekim wok bung wantaim opis bilong didiman insait long provins bilong strongim wok fama.

SRPM i save givim ol sevis bilong ol fama long givim skul o trenim ol fama, helpim wantaim ol pepa wok, filwok wantaim long fama, givim na soim rot bilong kirapim wok.

Ol nau i stap long Boana, Situm, Sialum, Menyamya, Aseki, Markham, Mumeng na Wau Bulolo. Ripot i tok olgeta hap we SRPM i stap nau i wok long kamapim ol gutpela ripot bilong wok.

# Ol meri egenism man maritim moa meri

## BUSTIN ANZU i raitim

PLANTI ol papamama insait long kantri i laik bai dispela pasin long maritim planti meri o bung marit i mas stop. Ol i tok, long wanem dispela pasin tasol long maritim planti meri i save kamapim planti hevi insait long famili.

"Sapos ol lain bilong ol nupela marit i bin senisim pik, dok kapul,

mani o kago long senisim o yusim olsem pei bilong baim meri, orait em wanpela meri tasol em orait. Na maski long maritim planti meri. Ol i mas rausim dispela pasin", wanpela hap pepa i tok.


Dispela pepa i kam long Wantok bihain long wanpela wan wik kibung bilong ol mama (ol papa tu i kam) i kamap long YWCA banis long Lae las wik Fraide.

Planti bilong ol dispela mama husat i kamap long dispela kibung i mekim strongpela toktok i go long gavman long senisim dispela pasin na noken moa kolim nem bilong en.

Pepa i tok; "Planti hevi we, nau i save kamap insait long famili, em taim wanpela man i maritim moa long wanpela meri. Ol famili i no save sindaun na silip gut. Olsem na dispela pasin bilong maritim planti meri i mas pinis".

• **LEPHAN:** Wanpela wait-meri i soim stail bilong em long Mosbi so.

• **ANINIT:** Taim bilong so na dispela wilwil i save stap long kisim ol man-meri raun long kisim kol win. *Ol foto: Franco Nebas.*



## Wau pipel kisim tok amamas i kam long Aitape pipel

### ARI GUH DANDEE i raitim

DIOSES Aitape Rihabilitesen Komiti long Aitape i salim wanpela bikpela tok tenkyu bilong ol i go long ol pipe' bilong Wau long bikpela helpim bilong ol i go long ol pipel husat i bin kisim bagarap long Julai 17, 1998.

Siaman bilong Aitape Disasta Komiti Mista Samson Hiogai i bin tok, mipela i laik tok bikpela tenkyu long oge-naisesen bilong yu emi ol pipel

bilong Wau, long taun na ol ples long dispela kain helpim bilong yupela wei yupela i bin salim mani inap long K11,259 i kam long helpim ol pipel long Aitape we planti ol narapela tu i wok long mekim.

Mipela i no klia tumas amas pipel i bin lusim laip bilong ol tasol, i luk olsem namba nau i stap em 2,200.

Na moa long 9,000 pipel nau i stap long ol lukaut sentas wanpela taim moa mipela i kisim dispela taim long tok tenkyu long ol pipel bilong Wau long bikpela helpim bilong yupela.

Siaman bilong Aitape Disasta operesen insait long Wau i tok ol i gat bikpela amamas na tu tok tenkyu i go olgeta pipel bilong Wau taun na Wau insait long ol ples wanwan long bikpela helpim ol i bin givim i go long Aitape long helpim ol wanwan lain pipel husat i bin kisim taim nogut long dispela bikpela hevi bilong solwara.

Kain pasin bilong ol wanwan pipel, ol bisnis na ol wokman-meri, Gavman na ol wokman-meri, ol kampani na wokman-meri wantaim olgeta pipel i bikpela.

Samting tru pipel bilong Aitape i luksave na i ken tingim yupela olgeta maski em i liklik helpim o bikpela helpim, Mista Hiogai i tok.

Mista Hiogai i tok tenkyu tu long ol sios na ol kristen man-meri na ol skul pikinini tu long sapot bilong ol.

Yumi olgeta i wanbel Aitape bai kamap nupela gen wantaim olgeta helpim wei i wok long kam long olgeta hap bilong dispela graun wantaim kodineta bilong Dioses Aitape Rihabilitesen Komiti long kamapim gut Aitape gen.

## Gavman laik stretim gut wara bilong Morobe na Galp provins

### KENNEDY EDENE i raitim

NESENEL Gavman bai stretim wara projek insait long Galp na Morobe provins wantaim K250,000

Provinsel na Lokol Levul Gavman Minista Simon Kaumi husat i bos bilong Nesenel Disasta na Imejensi Sevis wokim dispela toktok bilong ol projek las wik.

Mani bai kam long draut na fros rilif progrem aninit long Nesenel Water Sub-committee bilong Nesenel Disasta wok grup.

Mista Kaumi i tok dispela helpim em i bilong helpim gavman na haus lotu wok wantaim insait long developmen progrem, long lokol levul.

Olsem K40,780 ol i peim pinis i go long Galp Kristen Sevises bilong sanapim 15 wara tenks na 3-pela graun well long Kapuna haus sik insait long Baimuru distrik.

Narapela helpim bai kamap long ol haus sik menesmen, olsem K4,500 i go antap long projek.

Kaikai bilong dispela projek em iol-sikman na meri, ol famili, helt wok-

manmeri na sumatin ol i stap long Kapuna bai kisim helpim.

Mani olsem K216,000 ol i peim i go long Luteran Developmen Sevises bilong sanapim 21 graviti - fed wara sistem na ol liklik wel wara bilong 14,804 pipel stap insait long Morobe provins.

Sios konstraksen bai ka K42,500 na komyuniti bai givim fri leba na trenspotesen bilong ol materials o ol wok samting i go long ol hap bilong ol projek i stap.

Sanap bilong gavman em long givim fainens helpim i go long ol hap we ol i kisim bikpela bagarap long 1997-98 drai taim.

Olsem gavman i lukluk, Kapuna na sampela eria insait long Morobe i stap long grup 4 we i gat liklik wara, o nogut gutpela wara i stap na longpela hap long kisim wara.

Grup 5 em wara saplai i liklik tumas o nogut wara, sol o doti na i bagarap, na long kisim longwe hap.

Mista Kaumi i tok, dispela progrem em bilong kamapim gutpela dring wara bilong ol ruel komyuniti.

## Wimen's raits awenes woksap kamap long Lae

MOA long 130 meri bin kam bung long Lae siti las wik long wanpela wan wik kibung bilong ol meri. Ol meri insait long Hailens na Mamose eria i pulap tru long dispela kibung.

Dispela kibung em ol i bin kolim long "wimen's raits awenes woksop." Dispela as tingting bilong kibung em long lukluk long;

• kamapim raits bilong meri wantaim ol pikinini;

• givim strong long ol meri long painim sampela nupela rot long daunim ol hevi;

• givim gutpla tingting long ol meri long save long wanem ol samting kamap insait long kantri.

Aninit long dispela ol het tok, ol i bin sindaun, toktok na brukim gen ol i go liklik gen olsem long; mama lo bilong dispela kantri, wok bilong ol kot sistem, save long sik AIDS na TB, famili lo, wanwan wok bilong ol man na meri, pasin bilong kamapim bel isi insait long famili na wok ples, wok bilong meri insait long ol lowa levul gavman na raits bilong ol pikinini.

Wanpela grup we kam long Pot Mosbi we Ledi Hilan Los, meri bilong Nesenel Kot Jas, Kubulan Los i go pas long em, i bin lukautim dispela kibung.

Ledi Los i tokim ol lain husat i bung olsem i gat planti kain senis i kamap na ol meri i mas save long dispela ol senis.

Pinis bilong dispela kibung, Lae Siti Lod Meiya Toffano Mlonzing i givim setifiket long ol dispela 130 kos memba. Ol lain insait long Hailens em olsem Banz long Westen Hailens, Simbu na Isten Hailens wantaim ol sampela meri long Madang. Planti bilong ol dispela kos lain em long Morobe yet olsem long Lae siti na Makam veil.

"Ol i bin amamas long dispela kos long wanem ol i lainim planti nupela samting we ol i no save bipo. Planti bilong ol i tok olsem nau ai bilong ol i op. Ol i laik mipela i skruim narapela wik gen tasol mipela i no inap long dispela," Ledi Los i tok.

Em i tok tu olsem dispela em namba tri kos ol i bin ronim na tu em las bilong dispela yia inap neks yia. Em i tok tu olsem wanpela helpim o volentia grup Yuropien (European Union) i sponsarim dispela bung. Em i tok tenkyu go long dispela grup long wanem sapos ol i no lukautim ol, ol bai i no inap kam. Grup bilong em ICRAF i bin kam wantaim narapela grup, PEACE Foundation Melanesia.

## Wagambie askim Lae plis long wok bung

WANPELA sinia Plis Opisa i putim strongpela tok lukaut i go long olgeta plisman na meri olsem ol mas wok-bung wantaim olsem wangepa famili na lukautim ol pipel bilong ol.

Lae siti plis bos Sif Superintendan Tony Wagambie i bin tokim ol plisman na meri bilong en long wangepa pereid bilong ol insait long Bumbu Plis Bareks long las wik Trinde.

"Plis fos i mas sanap strong olsem wangepa tim na wokbung wantaim long dispela taim nogut. Ol narapela wanlain bilong mipela i lus nabaut pinis na nau em mipela tasol i sanap ples klia," Mista Wagambie i tok.

Em i bin tok olsem ol wan marit, Difens fos na ol lain CIS i gat ol hevi

bilong ol i stap olsem na nau em ol tasol i stap. Na olgeta manmeri i lukluk long ol tasol olsem na em i tokim ol lain bilong en long strongim wok bilong ol.

Em i tokim ol tu olsem kainkain taim nogut i kamap. Taim nogut bilong mani, politiks, ol straik na ol narapela hevi tu i mekim na nau ol i stap long mak nogut stret. Olsem na em i tokim ol long lus tingting long dispela ol samting na wokim wok bilong ol tasol.

Em i tokim ol tu olsem long konferens bilong ol PPC long Madang long narapela wik i go pinis, ol i mekim wankain toktok we ol i mas wok moa strong wantaim ol komyuniti bilong ol.

## Ol Lae mama askim long wokim maket arere long banis

"PLANTI ol kainkain lo i save banisim yumi olsem na wanem kain ol liklik bisnis yumi tingting long wokim long haus dua bilong mipela bai i no inap ron gut."

"Mi ken givim tok orait tasol ol dispela lo bai tambuim yupela long mekim o kamapim ol dispela haus-dua bisnis."

Lae siti Lod Meya Toffamo Mionzing i mekim ol dispela tok-tok bihain long pasim wangepa wan wik kibung bilong ol meri long las wik Fraide hia long Lae YWCA Hol.

Dispela em bihain long ol meri i bin mekim o putim sampela

strongpela tok promis o resolusen go long Lae siti Kaunsel olsem ol i laik bai siti kaunsel i noken rausim ol long; salim seken han klos, salim buai, salim ais blok, kukim mit na salim na wokim ol narapela maket long banis bilong ol yet taim ol i wokim wok bilong haus, olsem lukautim ol pikinini, kukim kaikai, wasim klos, na ol narapela liklik wok insait long haus bilong ol yet.

Ol i tok planti taim, ol i save go aut long wokim ol maket long ol bikpela maket tasol wok bilong haus i save pasim ol.

Na tu ol i save bungim birua long rot taim ol i go o kam bek long maket.

Long mekim isi, ol i laik long maket long banis bilong ol yet.

Mista Mionzing i tok ol i ken wokim ol dispela samting olsem ol i bin kolim sapos ol i bihainim olgeta rul bilong haus sik na taun. Tasol ol lo i karamapim ol dispela samting i tumbuim ol gen.

"Lo bilong siti kaunsel, helt, hausing komisin na ol narapela liklik lo i banisim yumi long salim ol dispela samting," Mista Mionzing i tok.

# Nogat trabel long Morobe So



MOROBE Provins Agrikalsa So i kamap nais long traipela san wantaim nogat trabel long dispela tupela de. Planti bilong ol dispela liklik hevi we i bin kamap insait long so graun em ol spak man tasol.

So graun Plis Stesen Komanda Inspekta Augustine Wampe i tok planti bilong ol dispela em ol spak man i wok long dring na nambaut we ol i lokim ol long wangepa lok-ap na bihain rausim ol i go taim spak i pinis.

Na sampela em ol i pik poket na sampela liklik kros na pait. Tasol em ol tok dispela em i no tumas olsem dispela so i nogat planti manmeri olsem na ol i no painim sampela bikpela hevi.

"Mipela i lokim moa long 10-pela lain long taun sel long stil na ol narapela trabel na wangepa man long bagarapim wangepa stail bihain long spak na mekim nabaut," Mista Wampe i tok.

Lae siti plis bos Tony Wagambie i mekim wankain toktok olsem Mista Wampe na tu tok tenkyu long ol plismanmeri, risevis na ol spesol long gutpela wok bilong ol we i nogat sampela bikpela hevi long dispela 1998 Morobe So.

• Ol pikinini i amamas long Morobe so.

## Kumul Studio meknais long Lae So

COCA-COLA empitiata long 1998 Morobe So i bin pulim manmeri na pikinini we ol amamasim dispela raun bilong ol long so. Long Sarere em ol lokol ben i winim prais.

Wantaim gutpela saund sistem bilong Kumul Studio long ol kol ples Goroka, planti ol lokol ben na atis insait long Lae siti, Momase na Hailens rigon i bin kam traime stail bilong ol. Ol narapela ben o atis husat i wokim kaset o laik wokim kaset wantaim Kumul Studio tu i soim pes.

Long Sarere ol i bin traime ol lokol atis o ben na putim prais bilong ol we ol Afiamis bilong Goroka i kisim pes prais. Em ol miks Madang, Manus, Morobe, Finsafen na Niu Ailen i win. Seken prais i go long Duah Bakee ben bilong Morobe na namba tri ples em ol mangi Mare long Gabensis.

Ol kainlain olsem Tropicals bilong Goroka, Mix Cas, Duah Bake bilong Groka i amamsim ol manmeri bilong ol tu. Long ol dispela, wangepa meri atis Monica Malbak i kam agirapim nek bilong em tu. Em i stailim nek bilong em stret wantaim maikropon na planti i amamas long lukim em.

Long pasim wok long tupela apinun em Chuck Berry bilong ol hailens, Lait Tuwai bilong Kainantu wantaim Len Yakal bilong Goroka i mekim ol sapotas i sanap antap long lek bilong ol.

Mista Teknisen na bos bilong Kumul Studio, Pat Siwi i amamas tru long wanem planti ol lokol ben na atis i kam soim kala na stail bilong ol.



• Ol manmeri i traime laki long sutim dat long Morobe So. Em hap wok bilong ol. Ol foto: FRANCO NEBAS.



• Long piksa, sejen dokta bilong Frans, Jean Michael Dubermard wantaim Clint Hailam na nupela han bilong em. Piksa na stori i kam long Courier Mail niuspepa.

## Namba wan man long kisim nupela han bihain long operesen

Long mun Septemba man Nu Silan tasol i stap na wok long Australia, Clint Hailam wantaim 48 krismas, i kamap olsem namba wan man long wol bilong kisim nupela han long ol dokta.

Hailam i bin lusim hap long hansut bilong em long wanpela birua long Nu Silan 14 krismas i go pinis na stat long dispela taim yet, em i save painim rot long kisim nupela han.

Tupela mun i go pinis, wanpela grup dokta bilong Australia na Frans i bin karimaut operesen we i mekim histri long joinim han bilong wanpela man i dai tasol insait long wanpela birua na kwiktai bulut i ron yet, na hariap wokim operesen bilong somapim wantaim hap han bilong Mista Hailam.

Ol sejen dokta i bilip olsem man ya bai i yusim han bilong em insait long 18-pela mun.

Mista Hailam bai i go bek long Australia long mun Disemba tasol em bai i save kisim marasin olgeta taim inap long dai bilong em.

Long tupela wik i go pinis, Mista Hailam i bin soim nupela han bilong em long wol na em i tok em i pilim gut wantaim em. Em i tok operesen ya i

olsem wanpela mirakel na em i pilim olsem dispela em i tru tru han i bilong em yet. Em nap long muvim ol finga bilong em tasol em i pret olsem nogut em i bagarapim nupela han bilong em.

"Wan wan taim mi pilim pen olsem nil i sutim mi tasol dispela em i liklik samting. Bodi bilong mi i stap gut tasol. Bai i kisim sampela taim long han bilong mi i kamap orait gut tru," Mista Hailam i tok.

Ol dokta i tok operesen i wok long go gut tasol na i nogat samting i kamap long soim olsem samting i rong.

Bihain em i lusim haus sik, Mista Hailam bai i stap yet long Frans bikos ol dokta bai i was gut long em.

Mista Hailam husat i bilong Nu Silan tasol i ronim wanpela bisnis bilong em long Perth, Australia na i save beis long hap i bin katim han bilong em long wanpela senso birua long 1984 taim em i stap long kalabus long paulim mani.

Ol ripot i tok taim em i go bek long Australia, em bai i fesim kot na wankain tu long Nu Silan. Em i tok em bai pait hat long lukautim em yet long kot.

## Taliban lida laik givim bin Laden i go long ol atoriti

Militeri lida bilong ol Afghan Taliban grup Mohammad Omar i tok em i tingting long givim mastamain bilong ol teroris Osama bin Laden i go long han bilong ol rilijes atoriti sapos Afghanistan i tok orait long en.

Mista Omar i tok em i wok long toktok wantaim ol savelain long kisim tingting bilong ol long dispela samting na sapos em i stret aninit long rilijes lo long givim Osama i go long ol.



• Osama bin Laden.

Wanpela opisel long Yunaitet Stes Stet Dipatmen i tok ol Taliban i wok long gat planti tingting nau long pasin ol i wokim long lukautim Osama, wanpela milionea teroris bilong Saudi Arabia tasol i hait i stap long Afghanistan. Osama i bin mastamainim bomim bilong ol Yunaitet Stets embasi long Is Afrika long mun Ogas. Planti hundred pipel i bin dai na kisim bagarap long en. Asisten Seketeri bilong Stet long Esien Afeas Karlin Inderfurth i tok Yunaitet Stets i sanap strong long askim bilong em long kisim Osama long kam aninit long han bilong lo long ol birua na bagarap em i kamapim long Yunaitet Stets.

Mista Omar i tok Iran i pret long Sunni Muslim Taliban grup long boda bilong em na Afghanistan.

Iran i gat Shi'ite Muslim grup long kantri bilong em. Nau ol i stap long birua wantaim Afghanistan bihain ol Taliban i bin kilim dai sampela diplomat bilong Iran long dispela yia.

Piksa na stori i kam long Courier Mail niuspepa

## Glenn raun gen long spes bihain long 36 yia

John Glenn i bin wanpela long tripela astronot bilong Amerika husat i bin mekim histri long kamap olsem namba wan man long sanap long mun long 1962.


Nau wantaim 77 krismas, Mista Glenn i strong yet. Long las wik, Mista Glenn wantaim sikspela arapela astronot i bin kalap long speis sip ol i kolim long Discovery long raunim wol. Planti pipel long Perth i bin lukim spesip long Pert klostu long Westen Welpa na Cape York Peninsula.

Mista Glenn i amamas tru gen bikos bihain long 36 krismas em i kamapim histri, em i kalap na raun'gen long spesip.

Presiden Bill Clinton bilong Amerika na meri bilong em Hilary i bin lukim tu lons bilong Discovery taim em i tekof long Cape Canaveral long Houston.

Wokabaut bilong dispela spesip i kostim moa long US\$500 milien.

Stori i kam long Courier Mail niuspepa



# LAIIPSTAIL

## Driman long yia 2000 na i go

MASTA WAI i raitim

**M**I bin sindaun insait long wanpela bikpela krused long Mosbi long las wik Sande. Dispela krused em narakain olgeta bikos em i namba wan taim bilong Papua Niugini long harim toktok bilong God long televisen we man i stap long Amerika na toktok i kam long dispela aua stret. Dispela em ol i yusim masin ol i kolim Setelait TV we i kam laip stret long Amerika na klostu long 200 kantri insait long wol i sindaun na harim long wanpela taim tasol.

Dispela em i wanpela kain lotu bung wantaim bilong olgeta manmeri insait long wol we olgeta i sindaun na harim wanpela tok tasol long wanpela taim. Wanem toktok dispela pasto o minista i toktok long en, em mi no laik tok tok long en tasol mi laik sut long dispela kain rot bilong bungim olgeta pipel wantaim aninit long nupela aidia o save bilong masin o teknoloji.

Long bipo, yumi save lukim ol kain kain misinari o ol man bilong autim gutnius i kam long ovasis na raun long olgeta hap bilong PNG na tu long arapela kantri na autim tok. Tasol nau dispela em nupela senis we man bilong autim gutnius i no moa raun. Em i stap tasol na toktok long wanpela haus lotu long kantri bilong em na toktok bilong em i kamap long olgeta hap bilong wol na olgeta manmeri i sindaun na harim stret long wanpela taim tasol.

Dispela i makim wanpela bikpela piksa o pasin bilong bungim olgeta manmeri wantaim na autim o tokaut long wanem samting yu laik olgeta manmeri i mas save. Ating sapos bikpela woa i laik kamap long wol tude, bai presiden bilong Amerika o kwin bilong Ingran na ol arapela lida bilong ol bikpela kantri bai toktok long dispela rot i go long olgeta manmeri bilong wol.

Wankain tu, yumi bin lukim long las yia taim meri bilong

Prins Charles, Ledi Daina i bin dai long ka taim ka em i ron long en i bin bam. Em i dai long bik siti Paris na ol i karim bodi bilong em i go long Ingran long haus bilong Kwin we ol i holim lotu na bihain kisim em i go planim long matmat bilong ol tumbuna bilong Kwin. Olgeta piksa long telewin i stapim olgeta arapela program bilong ol na piksa i stap tasol long dai bilong Ledi Daina. Olgeta bos bilong televisen kampani insait long wol i stapim olgeta program bilong ol na piksa i stap tasol long dispela dai.

Dispela em i olsem wanpela rot olgeta televisen insait long wol i mekim long bungim olgeta manmeri long olgeta hap kantri long bung wantaim na sindaun lukim na harim wanpela bikpela nius o samting we i kamap long wanpela kantri long wol.

Yumi ken lukim olsem pawa bilong televisen o piksa i ken bungim olgeta manmeri bilong wol wantaim long wanpela taim na aua stret long harim tok o lukim wanem samting i kamap.

Taim mi bin sindaun long Sir Hubert Murray Stadium long lukim dispela krused, mi lukluk raun na lukim moa long 4,000 manmeri insait long Mosbi siti i kam sindaun na harim gutnius bilong baibel dispela pasto i autim long Amerika na i kam long PNG tu. Taim ol manmeri i paitim han long Amerika, ol manmeri long stadium long Mosbi tu i paitim han. Bikos ol

manmeri i harim kli na save long wanem samting dispela man Amerika i toktok long en.

Pastaim mi ting em i wanpela piksa mi lukim wankain olsem long televisen long haus bilong mi. Piksa i kamap long bikpela blakbod long fran na mi sindaun tasol lukluk long en i stap. Tasol taim mi lukim olgeta manmeri i muv na paitim han na mekim singsing na eksen bihainim ol lain long piksa, mi ken luksave long pawa na strong bilong dispela sistem.

Dispela em wanpela bikpela na nupela rot ol saveman bilong ovasis kantri i soim long mipela olsem ol i ken bungim mipela olgeta manmeri isi tru, maski mipela i stap long wanpela hap kona bilong dispela graun. I no longtaim bai ol bikpela kantri long wol husat i go pas long olgeta samting we yumi (gavman bilong yumi) save kisim strong long en bai soim yumi ol kain kain nupela samting we yumi bai save long en. Ol bai soim ol stail na pasin bilong ol na save bilong ol tu we yumi bai maus i op tasol na amamas long kisim. Dispela em ol i kolim ol nupela teknoloji o nupela save bilong ol man we ol i yusim ol masin, pawa, kompyuta na arapela bikpela samting moa. Ol bikpela man o saveman bilong wol i tok, yumi kamap nau long taim bilong nupela save o dispela graun i kamap nau long taim bilong ol

masin na pawa long mekim ol samting.

Narapela nupela masin we i kamap pinis na planti bikpela opts na saveman bilong Papua Niugini i yusim pinis em wanpela kompyuta ol i kolim Intanet. Dispela kompyuta em olgeta ripot o stori o wanem kain tok tok i kamap long wol i stap long en. Ol toktok long wok o toktok bilong miting o toktok bilong mekim sampela samting i kamap na planti moa. Sampela taim, ol manmeri i ken salim pas i go kam long ol yet long dispela kompyuta. Yu no inap salim pas long Pos Opis. Yu raitim pas tasol long dispela kompyuta na putim adres bilong pren bilong yu long narapela provins o narapela kantri na ol bai kisim dispela pas bilong yu nau tasol long wanem hap ol i stap.

Narapela tu em ol bisnis na kampani i ken salim toksave long benk long dispela kompyuta na benk i ken redim mani bilong ol. Ol i no inap long go long benk na sanap long lain na mekim planti toktok. Olgeta samting i ron isi tasol.

Olsem na yumi ken lukim olgeta wok i ron isi tasol yusim ol dispela kain masin o kompyuta.

Long Australia, sampela dokta bilong Frans na Australia i bung wantaim na katim han o lek bilong ol man i dai na samapim long han o lek nogut bilong ol arapela lain husat i bin kisim

bagarap long ka o birua o mama i bin karim ol lek na han nogut. Long Australia yet, ol dokta i laik kisim lewa, kidni na kilok bilong pik na putim long ol man husat i gat hevi long dispela hap bodi bilong ol. Dispela em long sevim laip bilong ol.

Olsem na yumi ken lukim olsem kain kain save na masin i kamap na stap pinis long stretim laip na mekim laip i isi long dispela graun. Olsem yumi save harim long nius, God i givim save long ol man na ol i go insait long mun na arapela hap graun we i nogat win, diwai, wara, animol na ol man long en.

Mi ting olsem long yia 2000 na i go, bai yumi sindaun antap long ol nupela nupela senis na planti Papua Niugini manmeri bai i go skul long ovasis long kisim skul wantaim ol waitman long save long ol nupela save bilong kam bek skulim yumi na helpim yumi mekim wok isi wantaim ol senis. Planti bilong yumi husat i stap laip tude bai stap na lukim ol dispela samting i kamap na yumi yet i ken skelim long tingting bilong yumi yet we ol nupela samting i helpim yumi o nogat. Tasol taim ol bikpela senis i kam, yu tu i mas senis long redi long kisim ol. Nogut yu bai paul na sistem bai i no wok long yu. Dispela i min olsem edukesen na wok bilong yu i mas strong nau long stap insait long ol senis bilong 2000 na i go.



# KANAGE



■ Kanage i go raun long Wewak taun. Em i laik baim sampela kaikai. Na em i go insait long nupela Supa Maket. Em baim ol kaikai pinis na em kam autsait. Ol mangi bilong pik poket na lukim em na wok long bihainm Kanage. Ol i kam lukim Kanage i wok long rausim ol K2.00 na putim long poket na wokabaut i go olsem long benk. Ol mangi bilong pik poket bihainim em yet i go na lukim Kanage i sanap i stap. Orait wanpela mangi i laik pik poket long Kanage. Em i go na putim han i go daun long poket bilong Kanage. Man han i go i go nogat poket tu bruk. Kanage tanim na lukim mangi ya na tokim em poro yu kism pinis ha... tenkyu long tok halo long bos.

**Taidus Wetiou**  
**WEWAK**

■ Kanage i go long wok na em i no save olsem pren meri bilong em indai. Kanage wok i go bek na em i go long stua long baim lans. Na wanpela poroman bilong em tokim em. A Kanage yu no save ya pren meri bilong yu dai long moning long 10 kilok. Taim Kanage harim olsem em wari nogut tru. Mekim Kanage i no kaikai dispela kaikai em baim ya. Kanage wok i go pinis nau em i go long haus bilong em. Kanage i no waswas tu, em i go tenis tasol na em i go lukim bodi bilong pren meri bilong em. Kanage karai na toktok tu wantaim. Kanage tok olsem. Pren meri bilong mi maski siket bilong yu buruk buruk mi save laikim yu. Yu tok long mango mi baim bilong yu. Yu tok long laulau mi baim bilong yu. Yu tok long Yambo mi baim bilong yu. Yu tok long Kakomba mi baim bilong yu. O pren meri bilong mi.

**Johah Woms**  
**VANIMO**

■ Paps Kanage em wanpela bikman bilong ples. Wanpela taim em lokol turis i go long Ostrelia. Em i go raunraun i stap long siti na pekpek kilim em wansait stret em ron tasol i go painim ol pablik toilet na i go insait long wanpela rum na pekpek. Em pekpek pinis na painim ol toilet pepa. Tasol nogat olsem na em tekov. Em wokabaut i go liklik na lukim wanpela pawa pols na mekim nating long en. Em rausim hap wei tasol na ol polis kam kamap na singaut long em. Hey man its against the law, na paps Kanage lukim ol tasol na bekim, no its against he pawa pol. Taim em tok olsem em pinisim olgeta. Tarangau ol polis painim hat long toktok.

**Mal Mad. S.**  
**MADANG**

■ Kanage em yangpela man em i kontrak na i go wok long Kokonas Plentesin long Buka, tupela yia. Na papamama bilong Kanage tupela baim meri bilong Kanage, Kanage i stap wok tupela yia pinis long Buka na em i kambek long ples, taim em i kam em i bin baim wanpela bikpela mira na putim insait long sutkes bilong em na kam putim long haus. Taim em i kam pinis long ples, tupela papamama i katim sugaken na tokim tupela nu...la marit, yutupela i ken slip long wanpela haus na wokim gaden bilong yutupela yet. Em nau Kanage em i amamas tru long papamama bilong em na em i kism meri bilong em i go long haus bilong em. Em nau Kanage tokim meri bilong em mi go long bus na katim diwai bilong wokim banis bilong wokim gaden. Em nau Kanage i go pinis long wok. Meri kirap na tok olgeta taim yu no save opim sutkes na soim mi ol samting yu kism kam long nambis, em nau meri opim sutkes na lukim traipela mira na lukim pes, bilong em yet, na meri bilong Kanage em belhat nogut tru long Kanage na tok Kanage i kism wanpela meri no save soim mi. Em tok olsem



na em i brukim mira wantaim sutkes bilong Kanage, na meri i krai krai na i kam bek long wok. Meri kirap kism traipela stik na hamarim Kanage na tok olsem wanem meri yu kism na kam haitim i stap long sutkes a? Na Kanage lukim sutkes na mira bruk na stap long dua. Kanage kirap na tok i no meri. Mira yu em bilong lukim pes. Em yu lukim pes bilong yu yet, i no narapela meri.

**Jim Urebe**  
**GOROKA**

■ Wanpela apinun boi ros yah Kanage tromoi tromoi na saitim kona i stap long Wams strit long Ambunti distrik. Taim Kanage saitim kona yet na lukim wanpela wantok ples meri i kam. Man boi ros Kanage lukim meri yah na filins i kilim em wansait stret, na kirap tromoi hap tok pisin i go long wantok ples meri ya olsem wantok inap mi stori liklik wantaim yu o nogat. Meri yah harim dispela hap tok na kirap bekim. Meit yu kism filins long strit em bai yu lusim bos bilong yu rol karangi long strit yah. Moabeta yu painim wanpela meri na maritim em. Na bos bilong yu i ken stap oltaim na bai i no rol karangi. Boi ros Kanage harim dispela hap tok na kirap nogut na tokim meri yah. "Harim" sapos mi maritim yu em bai orait tasol yah. Pes na tok pisin em yu yah i no laik yu tasol sanplawa bilong Sepik wara.

**Linda Banjmarji**  
**AMBUNTI**

■ Kanage yet em bilong ples Wak Wak long Mendi. Wanpela taim nau Kanage i go spin long Menduli Supa Maket long Mendi. Semtaim tripela rait man tu ol i stap insait. Orait wanpela bilong dispela ol tripela rait man ya i kirap na i tok olsem tri of us just for fun let's go. Na Kanage i bin harim liklik. OK Kanage i bin kirap na i go autsait long stoa. Na em i wokabaut stret na em i laik i go long haus. Turangu namel long rot Kanage i bin lukim ka i kilim wanpela meri. I no long taim tupela plisman i kam long ka na bungim turangu Kanage. Na tupela plisman ya i askim Kanage olsem. A-A- yu who kill him. Na turangu Kanage kwiktaim i kirap na i tok mi. Na ol plisman i askim em wai. Na Kanage i tok olsem just for fun na tupela plisman i bin paitim Kanage nogut tru na tromoi Kanage i go insait long ka. Na Kanage i kirap na i tok olsem tri of us just for fun let's go. Na taim ol i kamap long plis stesen. Na ol plisman i askim Kanage olsem. A-A- you kamap tell us the story. Kanage turangu i kirap sanap na em i bin tok olsem. I stood here and she stood right over there, and than ka miyong, miyong, miyong bang.

**Kanage Tuku**  
**MENDI**

■ Paps Kanage em i bilong Raikos. Wanpela taim em i tokim Misis bilong em. Mi les pinis long stat long dispela ples. Mitupela i go long Wes Niu Britan provins na painim ol wantok long hap. Man, em i pestaim bilong Kanage long kalap long haiwe bas. Na em i kism hai filins stret i winim ol arapela filins. Bas i stop long Eriku na ol i go daun. Kanage i filim hangre na em i go baim wanpela bret na wanpela tin pis. Em wantaim Misis na pikinini bilong ol i sindaun long as bilong wanpela kokonas na mekim save i stap. Tupela i bisi long kaikai na i no tingim pikinini. Pikinini i go long rot na ka i bamim em na em i dai. Ol polis i kam na askim Kanage. Yu save long tok pisin? Kanage i tok no, inglis Kanage i tok yes. Orait ol i tokim em yu stori. Baga ya kirap na tok. I surik there and my white surik there. Tin pis and brad in namel. The truck ma yo ma yo ma yo-o peng. Misis Kanage tu i tok yes, yes. This truck ma yo ma yo peng. Polis komonda i rives long baksait na tekop.

**Thimots .O.**  
**BIALLA**

■ Kanage save skul long Wau hai skul. Wanpela taim ol turis i go raun long Wau na bihain ol i go long skul. Taim ol i go kamap long skul, het masta makim Kanage long kalap wantaim ol turis a em bai kism ol raun na soim ol ples. Nau Kanage kamap long bas na ol i go. Ol raun i go na long hap rot, wanpela turis meri i laitim wanpela sigaret na em smuk i stap. Man!, Kanage smelim smuk na em bagarap nogut tru, i go nau meri smuk i go na klostu smuk laik pinis. Nau Kanage kirap singaut long hap smuk, em kirap tokim turis meri olsem, Oh! Masta, Masta - one smoking is floating over here, nau turis meri givim em wanpela smuk. Kanage holim dispela smuk na nogat masis long laitim smuk, i go liklik na Kanage smuk na nogat masis long laitim smuk, i go liklik na Kanage tokim turis meri ya gen, Oh! Masta, Masta, I forgotten, one masis too is floating over here, thanks. Man! Olgeta turis insait long bas i holim bel bilong ol. Yu save Kanage em mangi Papua Niugini na em wokim tasol long PNG stail.

**Rumex Muyak**  
**LAE**

■ Pikinini boi bilong Kanage save skul long bikpela skul long Mosbi, (UPNG). Wanpela skul holide na em i go long ples long lukim papamama bilong em. Taim em i go kamap long ples, man! Papa Kanage i amamas long lukim pikinini i kam long ples. Long nait papa Kanage askim pikinini long wok bilong em long yunivesiti, ol save lainim wanem kain save tru long skul. Pikinini kirap

tokim papa olsem. Man! Papa, long skul mipela save brukim het tru long kainkain save, mipela save lainim - technology, - biology, diology na beology, planti moa. Kanage kirap tokim pikinini olsem, em kain save olsem em mas kism long skul. Nau papa kirap tokim pikinini olsem long tumoro moning san kamap bai tupela i go painim pis solwara. Tulait nau tupela i go kism kanu na pul i go namel tru long solwara, ples tu is tap long we tru. Nau pikinini kirap tokim papa Kanage olsem, papa! Sapos kanu kapsait bai yumi go olsem wanem! Nau papa Kanage kirap tokim pikinini bilong em olsem, my son don't you have to be worry, when our kanu - sinkology, we swimology to beachology, yu save lapun Kanage tu em hap yunivesti bilong bipo.

**Rumex Mayuk**  
**LAE**

■ Kanage pinis wok na i go long haus namel long rot em lukim tupela yangpela pisin bilong Lae hai skul sindaun arere long rot na mekim save long stori na laplap stap. Kanage kam longwe yet na lukim tupela na em kism tingting long askim laik long tupela bal kam klostu stret long tupela na mekim bikpela smail tru long tupela na tok, yupela kain yangpela pisin em orait tru tru ya, em nau wanpela bilong tupela meri kism tingting pinis na singautim em, paps o plis kain pani stori bilong yu tasol na mi tok yu kam sindaun liklik na mekim sampela pani stori bipo yu go. Em nau Kanage kism sampela gutpela tingting nau na em tok dispela tupela yangpela pisin nau bai mi autim. Em i go sindaun namel long tupela na mekim save long ol stori, tasol em yet em i no sekim trausis bilong em i bruk namel long tupela lek bilong en, nogat em mekim save yet stap long stori. Na tupela susa ya lukluk i go na lukim boi nogut bilong Kanage kamaut abrusim trausis bilong em na siip namel long tupela lek bilong en. Taim tupela susa lukim na tupela i no toktok o wanem tupela pinisim tupela yet na holim pasim maus bilong tupela, na bun tasol wok long guria guria stap. Kanage yet em i no save. Em ting tupela lap long ol stori em mekim tasol nogat. Tupela i tokim Kanage, paps yu gutpela man bilong mekim kain pani story tasol mi tokim yu, planim gut namel pos bilong yu sanap strong na mekim pani nogut yu pundaun. Kanage skelim dispela hap tok i go na em tingting tasol long wanpela hap tok planim namel pos gut i go na em lukluk i go daun long tupela lek bilong em na lukim mangi ya slip stap. Kanage lukim olsem tupela meri lap bikpela moa, sori tru bikboi Kanage lus nating namel long tupela.

**Gibson Bangra**  
**LAE**



• ANTAP: Ol sampela gutpela famili long Madang taun i amamas holim pas ol liklik pikinini bilong ol. Yu save pikinini em lewa ya. RAITHAN: • Kain pikinini olsem i laikim gutpela sapot bilong papa na mama.

# Pikinini i nogat asua na kisim pen

BUSTIN ANZU i raitim

**B**IKPELA tingting bilong ol marit insait long kantri bilong yumi na long narapela hap graun em long kamapim pikinini na lukautim i go bikipela na bihain kisim ples bilong ol. Ol marit tu, long pasin bilong laikim narapela narapela i save kamapim pikinini. Na tu sapos yumi ridim long buk Baibel, bai yumi painim olsem nupela bebi em i blessing bilong God.

Tasol planti manmeri long Papua Niugini na long wol i no save luksave wanem em i as bilong marit. Sampela i gat bikipela laik long kamapim pikinini, lukautim ol long kisim ples bilong ol long bihain taim. Sampela ol i marit long amamas tasol nai no redi long pikinini. Yumi ken lukluk long dispela marit long lav tasol o ol i save kolim "marit long rot".

Dispela pasin bilong marit nating long rot nau i wanpela bikipela hevi insait long kantri we planti meri i karim pikinini na tromoi i go long ol lain famili bilong ol long lukautim o ol yet i kilim i dai.

"Ol bebi i no save pundaun olsem lip diwai kam daun long graun. Em i save kamap long tupela, man na meri taim tupela i slip wantaim."

Bilong wanem na dispela pasin i kamap insait long kantri bilong yumi we yumi save gat pasin bilong laikim narapela na givim bel long ol? Tu yu save olsem dispela pikinini yu karim em i gat sol olsem yu yet? Wanem samting yu wokim long pikinini, yu yet i save olsem dispela pikinini i nogat strong long pait bek o tokim yu olsem wanem samting nau yu wokim i rong? Long ol dispela taim, yu gat dispela tingting o

nogat? Wanem samting em i wokim, mama bilong en i no wari tumas long bebi. Em tu i no tingim dispela pen em i bin kisim.

Sampela mun i go pinis na yumi bin lukim long ol narapela niuspepa olsem wanpela meri long Moreiguna Distrik long Sentral Provins i karim wanpela bebi boi na tromoi long sampela raba diwai bihain tasol long em i karim em. Narapela meri i harim krai bilong em na kisim em na lukautim em. Na givim nem Moses.

Dispela nem Moses tu i sut i go bek long Olpela Testamen we wanpela yangpela pikinini meri bilong king i painim Moses long wara Nail.

Sapos ol dispela lain long Moreiguna i no bin harim singaut bilong Moses long ol as bilong raba diwai, em inap long lusim dispela gutpela laip bilong em we tru tru mama bilong em i as bilong dai bilong em. Long bihain taim, taim Moses i kamap bikipela, tupela marit ya bai lukim em na tingting olsem bilong wanem na mitupela i no laik lukautim em.

Sampela hap long Papua Niugini tu wankain pasin i bin kamap. Sampela em ol i save ripotim na sampela i nogat. Sampela hap ol i bin ripotim em, long 2 mail long Pot Mosbi we ol i tromoi pikinini husat i stap laip na ol i kisim i go long Pot Mosbi Hospital, wanpela bodi bilong pikinini i dai pinis em ol i painim long nambis bilong Konedobu, narapela idai bodi ol i painim long baret long sait bilong Dame Mary Kekedo Gels Hol long Yunivesiti Bilong Papua Niugini, narapela bodi bilong pikinini ol i painim long rabis bin bilong Gels Hostel long Lae. Dispela meri ya plis i bin sasim em na em i kisim 7-pela yia kalabus.

Plantil ol Dokta insait long kantri i laik bai i gat lo we bai tok orait long ol meri



i gat bel i ken kilim pikinini. Long planti hap kantri em ol i kamapim olsem lo we i tok orait long ol i ken kilim ol. Ol Dokta ya i putim strongpela singaut i go long palamen long lukluk insait long dispela hevi. Tasol Minista bilong Helt Ludger Mond i tok dispela bai i no inap kamap olsem wanpela lo long palamen. Long wanem em bai bagarapim long sait bilong pasin tumbuna, long sait bilong kristen bilip na long Melanesian wei. Na bikipela samting tu em long ol meri bai amamas tasol long wokim dispela.

Nau long sosaiti bilong yumi, meri i wankain olsem man. I no olsem taim bilong bipo we meri i stap aninit long man. Meri i gat wankain pawa olsem man. Long sampela hailens provins, meri em kopi diwai we ol i gat strongpela bilip olsem meri bai go marit na kisim pei i kam. Olsem na ol i save les long meri i marit long rot.

Long sampela hap dispela em nogat. Meri laik mekim wanem em samting bilong em. Papamama i no save bosim ol tumas.

Olsem wanem na bai yumi stapim dispela hevi bilong marit long rot. Yumi mas traim long sindaun na skelim dispela hevi we i wok long kamap bikipela.

Long ol taun na siti i gat planti wei we dispela hevi i save kamap. Go long danis, wokim pren pasin long skul, go long pati na pren pasin long rot i save kamapim hevi bilong karim pikinini na i no lukautim.

Yumi mas save olsem dispela bebi yumi kamapim na bihain rabisim em, lusim em long rabis bin na wara, o kilim em i dai, em i gat sol na laip. Tingim gut bihain bilong em. Long kilim kain bebi olsem, em i traipela na bikipela asua stret. Em i olsem yu kilim narapela man i dai.

# YUMI FM

## PNG HIT PARADE

# 1 9 9 8

### Sponsors - TRADEWINDS

W/B	LW	TW	SONGS	ARTISTS
1	1	1	Rumaruma Te Mou'a	New Generation
2	2	2	Fenua No Te Penu	New Generation
8	3	3	Amari Ute	Patti Doi
3	4	4	Hau Bai Yu Save	Lista
1	7	5	Boen Sarere	Feedback
4	5	6	ToDes	Quakes
17	12	7	Madang	Demas Saul
12	11	8	Yu Kirap	Dirty Beggars
7	8	9	Halfie	Lista
6	6	10	Aitape Mi Wari	Kabu Rita
10	10	11	Takere Medley	Original Siros
20	19	12	Sore Daddy	Patti Doi
11	9	13	Kalo Beach	Azzimbah
0	20	14	Mama Bilong Mi	Lista
18	13	15	Wari	Azzimbah
5	14	16	Aitape	Patti Doi
15	17	17	Rabaul	Patti Doi
16	18	18	Kerere Garina	Guystars
9	15	19	Sissano	John Wong
0	0	20	Samarana	Vatdoro

IN: Samarana Vatdoro


OUT: Fugu Fugu Azzimbah



PNG FM PTY. LTD.  
Trading as  
NAU FM  
and  
YUMI FM

P.O. Box 774,  
Port Moresby  
Papua New Guinea  
Ph: (675) 320 1996  
Fax: (675) 320 1995

# Ston i kisim foapela brata



bilong en i pas na ol 4-pela brata bilong em i bin dai long en.

Tupela i wokim haus pinis na lapun meri i wok long lukautim tupela i stap. Ol i stap i go na meri bilong em i

karim 4-pela pikinini man na 4-pela pikinini meri.

Ol pikinini i kamap bikpela na ol i maritim ol yet i go na kamapim planti pikinini. Ol i kamap planti na klostu lapun meri i laik i dai em kolim nem

bilong ples Sapuge. Nau planti pipel i stap long dispela ples na dispela ston i stap namel long ples.

Philip Auke  
MANUS



**B**IPO BIPO tru long ples Surge insait long Is Sepik provins i gat wanpela man na meri wantaim 5-pela pikinini man bilong tupela i stap. Ol i stap amamas na nogat wanpela samting rong long famili bilong ol.

Tasol long wanpela de ol 5-pela brata i go long bikpela bus long painim pisin koki. Ol i go i stap long bik bus na bikpela ren i kam daun.

Bikpela ren i kam na ples i tudak nogut tru. Na ol 5-pela brata i ron i go na hait insait long bikpela ston. Ol i stap i go tasol ren i no pinis. I go go na dua blong ston i pas na ol 5-pela brata i stap pas insait. Ol i nogat rot bilong kam autsait na go long ples.

Ol i stap i go na nambawan brata bilong ol i dai na 4-pela tasol i stap. Ol i stap i go na nambatu brata bilong ol i dai. Olsem tasol i go na 4-pela i dai na las bon tasol i stap.

Las bon i wok long wari na krai i stap. Na wanpela lapun meri i go insait na askim boi ya. Olsem wanem na yu kam insait na yu i stap long dispela hap. Na las bon i stori long hau dua bilong ston i pas na tu em stori long 4-pela brata bilong em ol i dai insait.

Em i stori pinis orait, lapun meri i kisim boi ya na i go lukautim em. Em ilukautim boi ya i go na boi ya kamap bikpela. Boi ya kamap bikpela pinis na lapun meri i go long ples Walin long painim meri bilong boi ya. Taim em i painim meri pinis, em tokim tupela long wokim bipela haus klostu long dispela ston bipo dua



Nem: Raguell Mangamy

Krismas: 20 (meri)

Adres: Holy Spirit Convent, P.O. Box 107, Wirui, Wewak, ESP.

Save laikim: Mekim pen pren wantaim olgeta na senisim ol presen.

Nem: Jessie Dore

Adres: Balangore No. 1 Village, Vitu Island, WNB.

Save laikim: Stori tumbuna, redio pilai.

Nem: Ajax Sago

Krismas: 19 (man)

Adres: Keregia Community School, P.O. Box 171, Finhafen, Morobe province.

Save laikim: Pilai soka, basketbol, waswas long wara, harim lokol musik na raitim pas long ol pren.

Nem: Agao Gesag

Krismas: 16 (man)

Adres: Tokua Plantation, P.O. Box 65, Kokopo, ENBP.

Save laikim: Pilai ragbi, raun wantaim ol poroman, ritim niusepepa, laik mekim pen pren wantaim arapela lain.

Nem: Moses Kera

Krismas: 24 (man)

Adres: P.O. Box 923, Kimbe, WNB.

Save laikim: Go lotu, harim tok bilong God, pilai gita na singim gospel singsing, pilai volibal, basketbal, ragbi tas, na prenim meri long Siwai na Siane long smol Buka o long ol narapela ples tu.

Nem: Manly Kuaru

Krismas: 13 (man)

Adres: St Mary's Community School, P.O. Box 503, Wewak, ESP.

Save laikim: Pilai basketbal, ragbi, soka, waswas long solwara na rait long nupela pren

Nem: Jeffrey Kanai

Krismas: 23 (man)

Adres: C/ P.O. Box 442, Wewak, ESP, PNG.

Save laikim: Go long lotu, ritim baibol, harim PNG lokol musik, lukim TV, raitim leta long pren, pilaim soka, raun wantaim ol pren.

Nem: Tetac Mungi

Krismas: 18 (man)

Adres: NPC & Austraphane, P.O. Box 1841, Lae, Morobe province.

Save laikim: Pilai spots, harim musik, mekim pen pren na go lukim long narapela ples, go lotu.

Nem: Joel Wangimarik

Krismas: 17 (man)

Adres: Angoram Police Station, P.O. Box 396, Wewak, ESP.

Save laikim: Raitim pas long pren, senisim poto, waswas long Sepik wara, lukim piksa, harim musik, pilai volibal, tokpilai na raun lukim narapela ples.

Nem: Steve Micah Taupas

Krismas: 17 (man)

Adres: Ula Community School, P.O. Box 89, Aitape, Sandaun province.

Save laikim: Harim ol musik, raitim pas long ol pren, pilai volibal, soka na raun long arapela ples.

Nem: Helen Muiok

Krismas: 15 (man)

Adres: Bulai Village, P.O. Box 521, Madang, Madang province.

Save laikim: Go skul olgeta de, harim tok bilong tisa, pilai soka, tok pilai wantaim ol pren, harim musik bilong ol redio na danis, raitim pas i go long ol pren.

## Mi gat wari long slip wantaim meri

**Dia Pren,**

Mipela i amamas long yu long nupela bebi bilong yu.

I gutpela yu tingim famili plening bihain tasol meri i karim nupela pikinini.

Meri bilong yu bai i gat strong na inap taim long lukautim gut bebi sapos yutupela i plen gut long karim narapela pikinini bihain long tupela o tripela krismas.

Moabeta long yu na meri bilong yu i sindaun wantaim na toktok gut long dispela samting. Sapos yu no inap long go wantaim meri bilong yu long famili plening klinik, tokim em long go wantaim ol arapela meri.

Long planti kastam pasin long PNG, wanpela rot long larim pikinini i gro bikpela bipo long karim nupela bebi em long ol man i no slip wantaim ol meri bilong ol long tupela krismas bihain meri i karim bebi.

Tasol ol dokta i tok i nogat samting long medikol sait bilong stapim man na meri long slip wantaim tupela mun bihain long bebi i bon.

Bikpela samting em man na meri i wanbel long wanem rot bilong famili plening

ol bai i bihainim long spesim ol pikinini bilong ol.

Ol yangpela mama i save painim hat long lukautim namba wan pikinini bilong ol. Meri bilong yu bai i pilim taiet na em bai i pilim amamas sapos yu stap wantaim em long givim sapos na luksave long dispela hatpela taim bilong em.

Olsem wanem, yu ting olsem yu wokim gutpela pasin taim yu go aut wantaim ol narapela meri? Yu na ol narapela meri i save tu olsem long dispela rot, yupela i ken kisim/givim sik nogut olsem AIDS long dispela kain pasin?

Tu yu mas tingim yu wok long givim moa hevi long meri bilong yu husat long wankain taim tu i lukautim nupela bebi. Yu na meri bilong yu olsem ol papamama i gat wok long saposim wanpela arapela long lukautim na lavim bebi.

Yu tok olsem yu yangpela tasol nau yu kamap olsem wanpela papa. Nupela na bikpela wok i laikim yu long gat luksave long wok bilong yu na wokim sakrifais olsem wanpela bikpela man.

Laipain



**Dia Laipain,**

Mi wanpela yangpela man wantaim nupela bebi i gat tupela mun tasol.

Stat long taim meri bilong mi i karim nupela bebi, mi pret long slip wantaim em na mi save go aut wantaim ol narapela meri. Mi save go leit long haus.

Mitupela i save kros pait na mi no save pilim gut. Mi save wok long san na meri bilong mi i pret long go long famili plening klinik em yet.

CONCERNED FATHER







# Bik Bro REBO



IGO MOA NEKS WIK!



# SIPAK MAIKY



IGO MOA NEKS WIK!

## Opim ia na harim sori tingting

MI WANPELA mangi bilong Chuave, Simbu. Ples bilong mi Is Elembarei long Kapu Teine.

Mi laik autim sampela sori tingting long ol susa, olsem ol susa save go marit long narapela hauslain o narapela provins mi save sori tru long ol long wanem mama bilong mi em i karim wanpela susa bilong mi em i go marit na mi save sori long em.

Em man na mi holim i stap o em meri ya na lusim mi na go pinis nau, long wanem plen bilong God yet olsem na liklik sori tingting bilong mi kam inap olsem.

Tom Buckley  
SIMBU

## Vot ken long Embongu iletorol

Mi kam namba tri taim gen. Mi wanpela man bilong ples, tasol mi lukluk wanpela samting i no stret long ai bilong mi, long wanem tupela man i resis long wanpela memba bilong palamen.

Wanpela i tok memba bilong mi. Olsem na mipela man bilong ples i paul nambaut. Olsem na yumi mas vot ken na wanem man win bai em ken i stap long palamen.

I no ken wokim long laik bilong tupela. Tupela mas win long vot. Tupela mas win long maus bilong ol pipel. Tupela i no ken mekim nating long strong bilong tupela. Ol i mas vot na kaUntim gen. Na lukim namba bilong tupela. Em insait long Imbongu ilektorol.

Em tasol.

Robert Alu  
IALIBU

## Mi no hamamas long Queiks band

MI no hamamas long dipsela bank Queiks long taitel lair Nagam. MI wanpela sapota bilong dispela band tasol mi no hamamas tumas bikos ol i bin singim wanpela singsing lotu insait long dispela lokol keset. Dispela mi no hamamas long en. Bikos lokol singsing em i narapela na gospital em i narapela yet. Sapos yupela ol musik i laik composim singsing yupela mas go stret long lokal singsing na noken mixim long singsing lotu.

Tingim singsing lotu em i tok bilong god na lokal singsing.

Em i story bilong pasin lon graun.

Jokie Sox  
Kimbe

## Prais bilong ol samting i dia tumas

MI WANPELA boi i stap long Ambunti Distrik. Mi laik autim bel hevi bilong mi. Long lukluk bilong mi benk sistem em i daun tru na tu ol prais bilong stoa kaikai tu i wok long go antap moa na planti manmeri i painim hat tru long baim kaikai bilong stoa.

Dispela i klostu wankain tu long kaikai bilong maket. Bipo yu baim saksak long 30t na 40t tasol nau liklik saksak yu baim

long K5 na wankain long pis tu bipo yumi baim pis long liklik prais nau yu laik lukim prais bilong pis antap moa.

Long lukluk bilong mi ol pablik sevans i givim moa sevis long ol stoas insait long Ambunti distrik. Sapos ol pablik sevans i lusim kaikai bilong stoa na go long kaikai bilong maket stoa bai i no inap mekim inap mani long ronim dispela bisnis. Planti pablik sevans ol i kisim chek.

Taim ol i go long stoa long kisim chek bilong ol, ol i tok mipela i nogat inap kas. Dispela i mekim planti pablik sevans i painim hat liklik.

Sapos yu husat brata o susa i egensim o sapatim, dispela pas bilong mi, rait i go long the Edita Wantok niuspepa bai mi ken ritim.

Yamins  
AMBUNTI

## Traim na senisim pasin na tingting

MI WANPELA mangi long border country sait long Vanimo. Nau mi kaikai win raun long oil palm provins. Mi laik autim bel hevi na wari bilong i go long ol yangpela man meri na tu long marit man na meri.

Plis yupela mas traime na senesim pasin na tingting noken tingting tumas long pasin bilong dispela ground. Pasin bilong dispela graun em long sotpela taim tasol. Na two yu mas tingim bihain taim bilong yu. Long indai Bihain yu indai bai yu i go long wanem rot. Taim i klostu nau yu mi mas senesim tingting na pasin. Na tu

yumi mas pre hat long Papa God. Kam bek bilong Papa God em klotu nau. Yumi ye yumi i no inap kam olsem man meri Papa God em wanpela i lukim yumi kamap olsem man meri na pikinini.

So mi no wanpela bilip man. Mi wankain man olsem yupela. Olem samting mi lukim long ai i no gutpela na mi putim aut long Wantok Niuspepa.

Francis Akama  
Nuku

## Redio Kimbe i gat gutpela progrem

Dia Edita,

MI WANPELA man bilong Madang nau mi i stap long Kimbe. Mi marit long WBNP, na mi i stap. Mi i gat 25 yia nau. Mi laik tok amamas tru long redio stesin bilong yumi i save pilai ol tumbuna singsing na ol lokol ben na ol poro ben bilong PNG kantri.

Mi yet i save long ol progrem em ol anaunsa i save rerem na putim kamap insait long sixks aua long redio.

Wes Niu Briten em wanpela provins wei mi yet mi i stap longpela taim mi lukim ol pipel i holim pasin tumbuna olsem na redio stesin tu mas bihainim na putim kamap kankain ol samting bilong tumbuna i go insait olgeta taim long redio.

Em tingting long ol pikinini na ol bubu bilong bihain taim. Na tu em PNG kantri yumi mas i stap tru long tumbuna bilong yumi nogut ol bubu long bihain i bai ol i no save long singsing tumbuna olsem na Redio Kimbe i save wok gut tru long ol tumbuna progrem na mi save amamas tru.

Sapos yu husat brata o susa laik sapat o egensim em orait tasol. Tenkyu.

Simon Kosebi  
KIMBE



• Wanpela balot bokis bilong Sauten Hailens rijinel we i gat komplem long en. Ol opisa bilong lleksen opis i katim lok na sekim.

## Hanta setolmen mas painim nupela ples maket

Mi wanpela mangi Morobe na mi laik autim wari bilong mi i go long ol bikman husait save helpim ol manmeri na kaunsil bilong Wot 9 eria tu mas

lukluk long dispela tu. Longpela taim tru mi i stap hai long dispela setolmen inap mi winim sampela yia taosol i nogat liklik senis kamap long sait

bilong Hanta maket.

Liklik hap tasol em i rot bilong ka na manmeri maketim simul, bai wantaim arapela gaden kaikai long sait-sait tasol i nogat bikpela hap bilong maket long dispela hap dos i save bagarapim kuk kaikai olsem plava, karamap na arapela samting olsem kumu na rapela moa.

Nau mi wari long seti na gutpela bilong manmeri bilong Hanta setolemn na mi putim askim i go long kaunsil bilong Wot 9 olsem. Inap yu painim wanepela hap bilong putim maket?

Long sevim ol manmeri bikos planti taim, manmeri pikinini i save painim sik long kaikai das i save bagarapim na tu planti man meri dopen long mani bilong bikos ol i no wok manmeri.

Yu husait brata or susa i laik engensim o sapatim orait yu ken rait i go long Wantoke Niuspepa na mi ken lukim.

Dimiyat T Amot  
Lae



• Ol stall bas bilong Mosbi i gat ol piksa long en. Dispela bas bai go long Lae siti.

Sapos yu laik salim ol pas bilong yu i kam long dispela niuspepa, Salim i kam long dispela adres:  
**THE EDITOR  
WANTOK NIUSPEPA  
PO BOX 1982, BOROKO, NCD.**

## Distrik progrem menesa i no wok gut

MI WANPELA grasrut man bilong ples Gorex insait long Ambunti distrik na tu mi sitisen bilong Papua Niugini. Mi laik sapatim pas


bilong olupela prima bilong Morobe provins.

Dispela nupela rifom i wok long pinisim moa mani bilong provins na distrik wantaim long lukluk bilong mi ol progrem menesa bilong distriks i no yusim gut mani bilong distriks long wok bilong developim distrik na tu ol i no lukluk long lo na oda long distrik.

Ol progrem menesa wok long pulimapim poket bilong ol na i no lukluk long hevi bilong distrik. Wanem kemping mani na trevoling mani long pulimapim poket bilong ol na dispela i wok long pinisim moni bilong kamapim gutpela yu husat na sevis insait long distrik.

Sapos yu husat brata o susa i laik sapatim o egensim pas bilong mi, yu ken rait tasol i kam mi bai amamas tasol long lukim pas bilong yu.

Bonz Forex  
AMBUNTI



PNG


# BUSINESS

ISSUE NO: 301

NOVEMBER, 1998

PAGES 28

70t



## Real Estate in N.C.D

**PNG BUSINESS**  
**Novemba**  
**Issue!**  
*Bai kamaut*  
*Klostu....*

- **Business news and views in details**
- **PEOPLE IN BUSINESS** - Featuring a former public servant excelling in the art of copper beating.
- **COMMENTARY** - Dr Hamidian-Rad and the PNG economy.  
- Crime rates in PNG.
- **The VAT debate rages on.**

**PNG BUSINESS IS A MONTHLY PUBLICATION OF WORD PUBLISHING COMPANY**

FRONT COVER PHOTO BY: ROCKY ROE

COVER DESIGN BY: JADA WILSON - WORD

# softbal nius

1998/99 sisen

**POT MOSBI SOFBAL RIPOT**

## Bospidik i dai

OLPELA biknem sofbal pilaia Bospidik Pilokos-Meli i dai pinis.

Bospidik em nem planti man i save long em i wanpela biknem pilaia bilong Malangan sofbal klap long Pot Mosbi. Em i wanpela sinia wokmeri bilong Turisim Promosen Atoriti long hetkwata long Pot Mosbi.

Bospidik em i gat 40 kris-mas. Na em i gat tupela pikinini Chikui Posman na Jamie Steven Meli. Long

guttaim olsem wanpela pilaia, Bospidik em i gat nem long paitim ol baundri. Em wantaim sampela wimen pilaia olsem Mary Passingan, Sandra Sawaraba, Anna Kakot na Betty Paliau i helpim Malangan long kam long A gret.

Bospidik em bilong ples Lungatan viles long New Hanover long Nu Ailan. Em i wanpela gutpela spotmeri long taim em i stap long

haiskul yet. Bipo em i joinim Malangan, em i save pilai wantaim Wantok na Fuji - nau ol i kolim AB Bears. Em yet wantaim ol arapela pilaia i apim klap Malangan long 1991-92 long A gret long dispela taim ol i lus long Gazelle long grenfainel.

Long 1993-94 sisen, Bospidik i kepten bilong Malangan na ol i winim maina primia na tasol ol i lus long grenfainel long Wantok 6-4. Bospidik em wanpela

strongpela pilaia tru. Taim em i stap long Yunivesiti em i save pilai basketbal na soka. Na em i pinisim skul we em i maritim Kisakui Posman wanpela biknem pilaia, em i tu i kamapim nem stret long Yuni wimens tim.

Em wantaim wanpela wantok pilaia bilong em Dorcas Horris na em yet i save holim bung bilong Yunivesiti bipo.

Olpele klapa menesa bilong Malanga John Knox i tok em

wantaim Mary Passingan i strong long kirapim dispela klap. Ol i strong na go na winim Nu Ailan Sofbal tonamen long 1995.

Long wok bilong em olsem TPA opisel, Bospidik i bin mekim planti wok olsem long lukautim festival olsem 1995 Warama Festival long Brisbane, Australia,

1996 Roadshow long Japan na i no longtaim World Sea Kayaking long Manus.



• Susa ya, yu yet. Meri Rabaul i save long stail bilong sofbal olsem yu ken lukim long hia.

# Tripela tim joinim ENBSA

**IS NU BRITEN SOFBAL RIPOT**

IS Nu Briten Softbal Asosiesen bai statim pri-sisen bilong em long dispela wiken long Kokopo So graun.

Vais' presiden Vin Tata i tok i gat tripela nupela klap i joinim ENBSA long dispela yia em Fuji Bears, Kuli na Rakunai Yuts.

Fuji Bear em brens bilong AB Bears long Pot Mosbi. Wanpela biknem pilaia bipo Steve Raffin bai go pas long em we em i kisim ol yangpela long Sikut risetlmen eria long kamapim tim. Kuli em tim bilong ol meri long Raburua, Bitatita, na Rakunai Yuts em long ples Rakunai long Burma eria.

Tata i tok tripela klap i joinim asosiesen i soim tru olsem ol i gat bilip long asosiesen bilong em.

Ol klap husat bai stap long kompetisen long dispela yia em Ivarak, Islands Hawks, NGI, Black Phytons, Post PNG, C-Vui, PNGBC, Yokomo, Wantok na Barom. Namba bilong ol dispela klap i go antap long 13 olgeta.

Wanwan klap bai putim A na B gret tim long man na meri. Na long 22 de bilong dispela mun, junia kompetisen bai stat. Vais presiden i tok bikpela tingting bilong asosiesen long dispela yia em long holim bek taitel em i winim long Mt Hagen. Na dispela i min long holim yet tripela tim na painim inap mani long go na difendim taitel.

Is Nu Briten i gat 14 mamba i stap long PNG trening skwat. Ol pilaia em James ToVue, Martin Bobo, Stanley Wartang, William Wandalu, Siaini Turlom, Robin Lambert, Lucas Wamalia, Lipirin Putpulung, Rose Paula, Roddie Luke, Allan Tomang, Casper Womola, Arthur Kinakava.

Em i tok seleksen komiti bai skelim sapos ol dispela pilaia i ken pilai strong yet o nogat. Sapos nogat, bai i gat sampela ol yangpela pilaia i ken kisim ples bilong ol sapos ol i no fit.

Tata i tokaut tu olsem Mutrus em i sponsa bilong Is Nu Briten Sofbal Asosiesen. Dispela simuk kampani, Rothmans i gat bilip long ran bilong dispela asosiesen na bai sapatim gen long dispela sisen.

## Gazelle i statim sisen wantaim gutpela win

**POT MOSBI MENS SOFBAL RIPOT**

BIKNEM sofbal tim Gazelle i kirapim paia stret long Bisini oval long autim Aishi Bishman Bears 10-5 long bikpela gem bilong mens A gret tim las Sande.

Tony Daple, wanpela gutpela pilaia bilong Gazelle yet i kirapim tru skin bilong ol wan pilai bilong em taim em i paitim wanpela baundri. Baundri em min olsem bal i abrusim mak bilong pilai.

Daple i gat nem long mekim dispela kain pilai long paitim baundri. Em i paitim wanpela gutpela bal stret long bringim em yet wantaim Peter Urari na Hosea Utul.

Long dispela taim yet, AB Bears i wok long go pas long skoa 5-3. Tasol Daple i paitim baundri na Gazelle i go pas long skoa 6-5.

Bihain long dispela baundri, ol Gazelle i kirap wantaim paia stret na ol i wok long paitim bal bilong pitsa bilong Bears Esau Vinarang. Ol Bears i mas krosim ol yet bikos ol i mekim planti asua long i no tromoi gut bal.

Tripela arapela pilaia bilong Gazelle Luke Waldiat, Pius Martin na Francis Timbe i kam hom na apim skoa i go long 9-5

Tupela tim wantaim, Bears na Gazelle i putim strongpela tim na i no gat skoa i kamap long namba wan na namba tu ining. Pitsa Vinarang i givim 4-pela straik-aut long ol biknem pilaia bilong Gazelle olsem Daple, Martin na tupela junia pilaia Bernard Pamel na Isaiah Patimos.

Bears i rekotim skoa pas taim Joe Avuchulas i kam hom. Na bihain long em Daniel Amen na Greame Gangloff. Tasol ol Gazelle i no larim ol boi Bears i ranawe. Ol tu i kamapim

strongpela pilai rekotim skoa long namba foa ining.

Long namba faiv ininning Gangloff i paitim wanpela baundri na bringim em yet wantaim Amer i kam hom na apim skoa i go long 5-3. Taim Daple i belhat, em i abrusim olgeta mak na apim skoa i go antap wantaim wanpela baundri.

Long namba wan gem long moning, Elcom i wilwilim stret ol Hawks 16-0. Tupela yangpela pilaia Albert Koniel na Isikel Tovia jnr i pulim stret ai bilong olgeta lain sapota.

Insait long arapela gem, MSC i autim Tigers 1-0, Manalos i autim wantok bilong ol yet Malangan 7-1, NGI nekim Brown Eagles 5-3.

Long B gret divisen, Burma Raiders i fofitim Brown Eagles, Bears nekim Admiralty 5-3, Malangan fofitim Hawks, Karanas autim Gazelle 9-7 na Tigers i winim Tarangau 3-2.

# sofbal nius

1998/99 sisen

## RASA i bringim sofbal i go long pipel

### RABAUŁ SOFBAL RIPOT

#### HENRY MORABANG i raitim

WANPELA nupela sofbal asosiesen nau i kamap long Is Nu Briten. Nem bilong asosiesen em Rabaul Amateur Sofbal Asosiesen (RASA).

Tupela biknem pilaia bilong Gazelle bipo Wesley Peni na Ekonia Peni i statim dispela asosiesen wantaim helpim bilong NBC nius-

meri Elizabeth Tami. Arapela opisel em Raymond Theodore.

Presiden bilong Rasa em Nason Paulias. Ol i makim dispela ol opisel long wanpela miting i bin kamap las wiken long Rabaul.

Tami i tokim *Wantok* olsem dispela nupela asosiesen i stat bikos ol pilaia long Rabaul eria i save painim hat tru long go pilai long Kokopo.

Planti ol pilaia long Rabaul eria i no wok, na pe bilong PMV tu i go antap olsem na ol i ting olsem nupela asosiesen bai helpim ol tru.

Tami i tok olsem Rasa em i no rebel asosiesen tasol em long helpim ol lain husat i laik pilai sofbal i ken joinim. I gat samting olsem 13 klap olgeta. Em i tok 8-pela klap bilong ol man na 5-pela klap bilong ol meri.

RASA i laik bringim sofbal i go bek long ol pipel olsem na ol i makim pinis tripela ples bilong holim kompetisen bilong ol. Ol dispela ples em Malaria Oval long Nonga, Maltech Hai Skul oval na Pilapila oval.

Peni husat em wanpela saveman long holim sofbal resis i tok olsem ol i makim tripela ples long larim ol pipel i ken kambek gen na pilai sofbal.


Dispela gem bilong sofbal em namba wan gem bilong ol pipel long Is Nu Briten.

Tami i tok sampela ol biknem tim long Matupit olsem MSC na Brown Eagles i joinim pinis dispela nupela asosiesen.

Peni Tonga i statim tu wanpela nupela tim em ol i kolim Talili Gazelle.

Peni Tonga em wanpela skora bilong Pot Mosbi Wimens Sofbal Asosiesen tasol nau em i risain na stap long ples.

Dispela em i namba wan taim RASA bai kirapim kompetisen bihain long bikipela maunten paia i stat long 1994.



• Dispela kain stail bai kamap long sofbal ya bikos sisen i stat na ples bai pulap stret long ol pilaia. *Photo file.*

## Lae sofbal i stat isi tru

### LAE SOFBAL RIPOT

PRESIDEN bilong Lae Sofbal Asosiesen Noah Warkia i bilip olsem sisen bilong 1998/99 bai kamap strong tru.

Em i mekim dispela toktok bikos i gat planti fofit i bin kamap. As bilong ol dispela fofit em bikos asosiesen bilong man na meri i kam bung na fomim wanpela asosiesen tasol.

Long las yia na yia i go pinis, Lae i save gat tupela asoseisen. Asosiesen bilong man na asosiesen bilong meri.

Warkia i tok planti klap i laik stretim ol yet bikos planti klap bilong man i nogat meri na dispela tu i wankain long ol meri.

Tasol long ol gem i kamap las wiken, sempion tim Brown Eagles i wilwilim stret Coca Cola Aviat 8-3.

Eagles i gat wankain ol pilaia husat i bin pilai long klap. Ol i wok long yusim gut ol asua Aviat i wokim long rekotim ol win.

I tru namba wan pita Victor Bunbun i kambek, dispela i no helpim tru Aviat long daunim pawa bilong Brown Eagles.

Tupela tim wantaim i kamapim gutpela pilai stret. Ol i no inap long rekotim skoa inap sampela taim.

Tasol ol Eagles i brukim kiau long namba tu inning.

Aviat i no wari na rekotim tupela hom long Julius Uvia na Henry Meli. Skoa nau i sanap 2-1 long sait bilong Aviat.

Eagles i no wari. Ol i wok long pilai bikos planti ol pilaia bilong Aviat i no fit tumas.

Olsem na Ray Manub na Nick Paivu i ran kam long hom bes.

Manub na Paivu i kam hom na skoa i go long 5-2. Em i paitim wanpela gutpela bal we ol infil pilaia i no inap stapim.

Ol dispela tripela pilaia bilong Eagles gen Manub, Paivu na Tube i surikim skoa bilong ol i go long 8-3.

Insait long ol arapela gem Bismarck i waraim stret Taubar 20-4, NGI i autim Manalos 3-2, Karanas i wilwilim stret Island Hawks 20-1 na Malangan i nekim YMCA 8-7.

Insait long gem bilong ol meri, Aviat i nekim Eagles 3-2, Bismarck autim Taubar 23-1, Karanas i winim Island Hawks 3-2, Manalos fofitim NGI na Malangan tu i fofitim YMCA.

## PMWSA bai holim skoring klinik

### POT MOSBI WIMENS SOFBAL RIPOT

POT MOSBI Wimens Sofbal Asosiesen i makim dispela yia long stretim wok bilong skoring, ampaia na ol wok teknikel long mekim gem i kamap gut na strong.

Presiden bilong PMWSA Elizabeth Molori i autim dispela toktok long *Wantok* Niuspepa olsem eksekutiv bilong em i makim dispela yia long kamapim gut stendad bilong ol sofbal gem. Dispela i min olsem asosiesen bai ranim kos bilong skoring na ampaia.

Molori i tok namba wan kos bai stat long Novemba 14. Dispela em kos bilong skoring we em i askim olgeta klap long salim tupela pilaia o opisal husat i laik kamap skora bilong klap long dispela kos. Em i tok dispela kos bai ran inap wan hawa tasol long moning. Kos bai stat long 8 kilok na pinis long 9 kilok na long apinun, ol skora bai lukautim gem long apinun.

PMWSA i makim pinis Julie Tatai long ranim dispela kos. PNG Sofbal Federesen i makim tu Misis Tatai long lukautim Sauten Zon rijen we sapos wanem asosiesen i laikim dispela kos i mas ringim em.

## Unicats autim Elcom

### MT HAGEN SOFBAL RIPOT

UNICATS i autim tiket bilong pawa man, Elcom 9-2 long bikipela gem bilong men A gret kompetisen long Mt Hagen las wik.

Insait long arapela ol gem, Brown Eagles autim United 8-2, Malangan nekim Bismarck 7-5.

Long gem bilong ol meri, NGI i memeim, Royals 13-3, Unicats wilwilim Gazelle. Gazelle i no putim wanpela skoa liklik. Poin lata bilong ol meri i sanap olsem Unicats 4, NGI 4, Gazelle 4, Wantok na Royals 0.

Mt Hagen Sofbal Asosiesen i holim presentesen long Gomis oval

long Sarere we ol opisel i givim awot i go long ol tim. NGI i winim tupela primiasip taitel long divisen bilong man na Unicats long ol meri.

Elcom husat i pait hat long winim primiasip i kamap namba tu. Na wankain tu long NGI husat i sempion tim tasol i abrus na kamap namba tu long Unicats.

Ansalom Bunbun (Brown Eagles) na Sunema Vue (Malangan) i winim bes aufilda awot. Na ol pilaia i winim mos impruv awot em Allan Poipoi (United) na Monica Kundi (Royals). Kundi em wanpela meri hailens tasol em i save soim gutpela stail we i winim tru meri long nambis long winim taitel ya.

## Ol pilaia i senisim klap

### LAE SOFBAL RIPOT

SOFBAL sisen i stat na i gat planti senis tru i kamap. Long Lae, i pilaia i wok long senisim klap na ating wankain pasin tu i mas kamap long ol arapela senta.

Manalos klap i sainim pinis biknem pita bilong Pot Mosbi na Post Island Hawks Malom Paikara.

Presiden bilong Lae Sofbal Asosiesen Noah Warkia i tok olsem planti pilaia i wok long kalap kalap long tim bikos asosiesen bilong man na meri i bung nau. Na aninit long lo bilong asosiesen olgeta klap i mas i gat tim bilong man na meri.

Paikara, Alfred Malisa, John Pidik, Nick Paivu, Thompson

Tavua, Victor Bunbun, Jerry Iga na John Tube i gat nem long mens sofbal long Lae. Ol dispela pilaia nau tu i senisim klap ya.

Paikara na Iga nau joinim Manalos. Iga em i save pilaia ketsa bilong Avia Jets. Tupela nau i joinim klap na bai mekim strongpela stret ya.

Ol tripela pilaia ya Tavua, Paivu na Tube i joinim Brown Eagles. Tavua i joinim gen Eagles bihain long em i pilai wantaim Malangan las yia.

Paivu em i kosa na pilaia bilong NGI Lae tasol nau joinim Eagles. Tube i lusim Pot Mosbi na nau i kam pilai tu long Eagles Lae.

John Pidik husat i gat nem long kalap kalap

long ol klap nau i pilai long Malangan. Arapela pilaia husat i lusim Pot Mosbi em Malisa.

Bunbun husat i save pilai wantaim Gazelle nau i go bek long Aviat bihain long Gazelle i sensim nem i go long Burma Raiders.

Na long resis bilong ol meri, tripela klap i bin bruk em Difens, Coronation na Elcess. Olsem na ol pilaia nau i wok long painim nupela klap.

Ol pilaia bilong Difens i joinim Taubar, na ol Coronation i joinim YMCA na Elcess i bruk long tupela hap. Sampela pilaia olsem Lavinia Sadgrove i joinim Bruma Raiders na arapela tim we Carol Yawing na Claire Augwi i joinim NGI.

## Salamanda bai traim long difendim taitel long Lae tas kompetisen

FRANCO NEBAS i raitim

SALAMANDA stret bai traim long difendim taitel bilong ol gen long Sande taim ol i bungim PC Bulets long Lae 7s tas asosisen gren fainel. Dispela yia bai lukim namba tu yia Salamanda bai strong long winim dispela taitel bilong ol man. Dispela gren fainel bai kamap long Eriku Ovel long Lae.

Long ol arapela gems, Coronation bai kisim Kobari long open wimen, Bundi Gaints bai traim strong wantaim Eriku Grips long senia mens na U21 DOM bai skelim strong wantaim 3M Warriors.

Long gren fainel bilong ol man namel long Salamanda na PC Bulets bai lukim strongpela gem kamap long tupela tim ya. Salamanda i gat wankain ol pilaias olsem brata tim bilong ol long Papua compound Bulets.

Bullets em nupela klab tasol we i kamap long dispela yia tasol i no

nupela em ol mangi long Citos klab bipo i buruk na kamap dispela klab. Dispela bai namba wan taim bilong ol long stap insait long gren fainel bilong Lae tas long dispela yia.

Baga nogut husat bai i go pas long dispela tim long Sande em bai pilai kosa Zico Nou. Nau i gat planti ekprens na em bai go pas long win bilong long dispela fainels. Salamanda em ol bai laik winim taitel bek tu bek long dispela yia na bai putim strongpela gem stret. Ol i bin kisim maina primia long dispela yia na nau i laik gen lukluk long mesa taitel.

Keptan Armstrong Rawlynson i tokim Wantok olsem long dispela wik, ol bois bilong em i kamap gut long trening na i sambai tasol long bungim Bulets long Sande. Em i tok, "dispela yia i bin gutpela stret bilong Salamanda long wanem ol i bin pilai gut na winim maina primia taitel na i lukluk gen long difendim taitel bilong ol."

Ol boi's husat bai kisim fil long

dispela Sande em, Armstrong, Paul Sokalamis, Getso Benson, Alan Anaetamo, Ari Peter, Thomson Awa, Wanix Dimura, Murphy Memafu, George Wiarabu, Dane Rawlynson, Ludwik Sokalamis, Derrrol Kuroi, Richmond Kababa, Francis Anaetamo na Dylan Rawaiya.

Armstrong i amamas long ol junia pilai's bilong em long bin kamapim ol gutpela pilai long dispela yia. "Ol yangpela mangi olsem, Derrol, Ludwick, Francis na Richmond i bin kamapim gutpela pilai na kam antap pilai long senia tim, em i tok. Long dispela taim Lae tas asosien i amamas long ol dispela ol klabs husat i bin pilai insait long komptisen long dispela yia.

Dispela yia em gutpela yia we i bin nogat planti hevi i bin kamap na ol opisol i laik tok bikpela tenkyu tru long olgeta klabs. Na tu ol dispela klabs husat bai go long fainels long pinis bilong komptisen long Sande.

## Lae Hammerheads sambai long Hong Kong Sevens

HAMMERHEADS bilong SCRUM long Lae bai pilai resis wantaim ol narapela kantri long HongKong sevens tonamen we bai kamap long dispela wiken.

Kosa Robin Tarere wantaim ol mangi bilong em i lusim pinis kantri long nau na sambai long dispela bikpela pilai. Kosa Tarere i tok em i nogat ol nem pilaias tasol dispeal i no bikpela samting.

"Mi bin gat ol gutpela mangi long apstaim tasol palnti bilong ol i lusim long sait bilong wok na skul. Olsem na nau mi nogat ol nem pilaias tsol wanem namba mi gat em i orait tasol. Ol bai putim ol top tim wantaim ol slek tim. Olsem na mipela i gat sans long pilai i go antap," Tarere i tok.

Ol tain ya em Joe Tolip (kepten), Peter Kone, John Tukai, Rao Ganiga, Henry Gima, Francis Tike, Jack Warkurai na tim menesa em

Naga Songake.

Tolip, husat i memba tu kepten bilong Pukpuks na husat i gat sampela save long pilai bai bosim ol mangi.

Narapela em gret 12 skul sumatin bilong Lae Intensinol Hai Skul Francis Tike husat i kamapim sampela hetpen taim em i pilai long skul spots i stap isnait long dispela lis.

Kosa i tok tu olsem em i no daunim dispela tim bilong em tasol em ig at strongpela tingting olsem ol bai kirapim sampela das long hap.

"Las yia mipela i go pilai long kap kuata fainols wantaim wanpela tim long Ostrelia na lus 22-19. Tasol dispela em wantaim ol narapela mangi. Tasol nau em narapela gen, tasol mi gat strongpela bilip mipela bai wokim," Tarere i tok.

Olgeta rt bilong ol long go na kam em SCRUM bai lukautim.

## PCNA i stap long namba 4 raun



• Gem namel long Courts na Ela Motors long Divisen 1. Ela Motors em wanpela tim husat i bin lusim Divisen 2 na surik go antap long top gred.

PRAIVET Kampani netbal kompetisen nau i ran i go insait long namba foa wik bilong en long Rita Flynn kot long Bisini oval.

Samting olsem 72 insait long 9-pela divisen i wok long brukim bun long winim primiasip. Dispela namba bilong tim i mekim PCNA olsem wanpela bikpela kompetisen bilong ol meri long op-sisen.

Tupela nupela tim em ANZ na BSP. Dispela tupela tim i save pilai aninit long Bankers Netbal kompetisen tasol nau ol i senis gen na joinim praivet kampani kompetisen.

Sekretari bilong PCNA Kila Gei i tok ol meri i soim bikpela laik tru na em i amamas long lukim olsem ol kampani i sapatim tim bilong ol.

Em i tok em i gat tingting olsem dispela kompetisen i ken holim ol meri wantaim long kamapim gutpela prensip na ol meri i ken save long wanwan long taim bilong dispela netbal resis.

Insait long jenerel miting long Oktoba 21, i gat tupela nupela opisel i bin kisim ples bilong ol olupela husat nau i no stap moa long kantri. Ol olupela opisel em Barbara Penrose Stubbings (asisten tresera) na Moro Kasisi (asisten sekreteri).

Mabata bilong Craftworks i winim sia bilong Kasisi na Sue Kenken i winim sia bilong Penrose.

Arapela toktok tu i kamap long miting em nupela sas Pot Mosbi Netbal Asosiesen i givim i go long PCNA long yusim netbal kot. Nupela sas em K4,900.

Na dispela sans em PCNA i ting i bikpela tumas. Dispela nupela sas i karamapim kot, wara, toilet, pawa na lukaut bilong ol graun.

Gei i ting olsem dispela nupela sas i no gutpela bikos PCNA i wok long traim strongim netbal long dispela kain ol kompetisen.

# EPC redi long Novemba 14

EPC SOKA RIPOT

NAMBA 21 Isten Papua Soka Kanival (EPC) i redi long stat long Novemba 14 long Sir John Guise stadium, Waigani.

As tingting bilong dispela tonamen em Fair Play i bihainim tingting bilong Wol Kap long dispela yia long Frens. Dispela tingting bilong Fair Play i wankain olsem tingting bilong EPC long strongim soka, stap bungwantaim na strongim pasin bilong Milen Be provins.

Dispela EPC tonamen i pulim tim bilong man na meri long 6-pela distrik long Milen Be. Ol dispela distrik ya em Rabaraba, Alotau, Samarai, Esa'ala, Kiriwina na Misima.

Samting olsem 80 tim

olgeta bai resis long EPC tonamen bilong dispela yia. Ol man i gat 56 tim na meri i gat 24 tim. Dispela tonamen bai ran inap long 4-pela wik na i no 6-pela wik olsem i save kamap bipo.

I gat 5-pela tim long ples tu bai stap insait long dispela tonamen. Ol tim ya em Baniara (Rabaraba), Suau East (Samarai), Samarai Saeyas, Oyabia (Kiriwina) na Hikabo (Misima).

Ol eksekutiv bilong EPC i pasin tok las wik olsem rejistresen bilong ol tim em K250 (man) na K200 (meri). Na wanwan pilai bai baim K50 rijestresen fi.

Presiden Gerald Mwayubu i askim ol tim husat i no baim ful fi bilong ol long baim long dispela wik Fraide. Sapos ol tim i baim fi hariap, dispela bai givim sans long ol i redim olgeta

samting bilong tonamen.

EPC eksekutiv i makim olsem K26,800 long holim dispela tonamen. Samting olsem K18,000 bai i kam yet long afiliesen na rejistresen fi. Dispela i min olsem samting olsem 1,600 ol pilai bai stap insait long soka tonamen bilong dispela yia.

Dispela ol man em bilong baim graun (Sir John Guise stadium), referi, lainsmen, baim bal na ol tropi.

EPC komiti i singaut i go long olgeta memba bilong Milen Be olsem Namba tu praim minista na minista bilong Tesera Iairo Lasaro (Alotau), Gavana Dame Josephine Abaijah (Rejinel), Titus Philemon (Samarai-Murua), John Kanadi (Esa'ala) na William Ebenosi (Kiriwina-Goodenough) long givim sampela helpim mani.

## AGM surik i go long Februari 25

PNGFA RIPOT

HENRY MORABANG i raitim

PAPUA Niugini Futbol Asosiesen i surikim anual jenerel miting bilong em i go long Februari 25 long neks yia.

Presiden bilong PNGFA Peter Mommers i mekim dispela toktok bikos konstitusen bilong PNGFA i no redi long ol presiden i ken lukim.

Mommers i askim olgeta presiden long noken planti toktok bikos konstitusen em i wanpela bikpela samting we i ken helpim long ranim gut kompetisen na asosiesen.

Presiden i tok em i sori tru long surikim long niu yia. Em i tok olupela de na mun bilong miting em long Novemba 27 tasol nau bai nogat.

Mommers i tok arapela as bilong surikim dispela miting go long Februari em bikos em yet bai go stap long wanpela miting bilong FIFA long wimen soka. Em wantaim 15 arapela memba bilong dispela komiti bai sindaun long paitim toktok long wimen soka long wol.

• Insait long arapela soka nius, Pot Mosbi Soka Asosiesen i bihain nupela sistem bilong fainel long larim 7-pela tim olgeta i pilai long fainel.

Presiden bilong PMSA Dr

Kuam Malai i tok dispela nupela sistem em long givim sans long arapela tim tu long stap insait long fainel. Em i min olsem namba 6 na namba 7 ples i pilai nokaut. Sapos wanem tim i lus em i hangamapim su inap neks yia.

Na long dispela wik Sarere, em namba 4 na 5 bai skelim strong.

Nau yet i gat planti paul toktok long wanem na Dr Malai na eksekutiv bilong em i kamap wantaim dispela nupela sistem.

Sekretari William Vui i sapatim bos bilong em Dr Malai na tok olsem dispela nupela sistem i givim sans long ol arapela tim.



# Wiken Spots Dro

### PRIVATE COMPANIES NETBALL

Sunday, November 8, 1998.

**Division 1**

- 1.00 Fardeal (1) vs Ela Motors
- 2.45 Daltron vs Pom Travelodge (1)
- 2.25 SP Holdings (1) vs Post Courier (1)
- 3.10 Courts (1) vs Steamships (1)

**Division 2**

- 1.00 SP Holdings (2) vs Shell
- 1.45 Coca Cola vs POM Travelodge (2)
- 2.25 Steamships (2) vs Deloittes
- 3.10 Theodists vs Word Publishing

**Division 3**

- 1.00 MBA (1) vs Fairdeal (2)
- 1.45 Rothmans vs Brian Bell (1)
- 2.25 EFM vs Yellow Pages
- 3.10 Raywhite vs City Pharmacy

**Division 4**

- 1.00 National (1) vs Mobil
- 1.45 MBA (2) vs Kenmore Group (1)
- 2.25 Post Courier (2) vs Pacom
- 3.10 PNG Stationary vs Pryde Furniture (1)

**Division 5**

- 1.00 Paterson Lawyers vs PNG Transport
- 1.45 Courts (2) vs Arnotts
- 2.25 Trukai vs Brian Bell (2)
- 3.10 Bank South Pacific vs Tradewinds

**Division 6**

- 1.00 Pryde Furniture (2) vs IS. Travelodge (1)
- 1.45 Goodman Fielder (1) vs Eda Ranu (1)
- 2.25 National (2) vs Remington (1)
- 3.10 Hitron (1) vs Craftworks

**Division 7**

- 1.00 PNG FM vs Goodman Fielder (2)
- 1.45 Bishop Bros (1) vs Lamana
- 2.25 Remington (2) vs IS. Travelodge (2)
- 3.10 A.E.I vs Air Niugini

**Division 8**

- 1.00 BHP Steel (1) vs Century Group
- 1.45 Hitron (2) vs Bishop Brothers (2)
- 2.25 Kenmore (2) vs Eda Ranu (2)
- 3.10 DHL (1) vs Enertec Intl (1)

**Division 9**

- 1.00 ANZ Bank vs Enertec Intl (2)
- 1.45 Goodman Fielders (3) vs Kenmore (3)
- 2.25 Avis vs DHL (2)
- 3.10 Aust. High Schol vs BHP Steel (2)

### PORT MORESBY SOCCER ASSOCIATION 1998 FINALS

Saturday November 7, 1998.

**Bisini 1**

Time	Division	Fixtures
08.30	U19	Telikom vs ICPNG Pom Utd
10.00	W2	Keras vs Adu Y. Pages
11.30	W1	Wanzesi vs Normads
01.00	P/Reserve	Telikom vs Adu Y. Pages
02.30	P/Reserve	ICF Uni vs Rapatona
04.00	Second	KTS vs Mukaso

**Bisini Two**

08.30	U19	Guria vs Coecon Ela Utd
10.00	U19	Tarangau vs ICF Uni
11.45	W2	IBS PS Utd vs Cyclone
01.20	First	Cosmos vs Simia

03.20 Premier Guria vs IBS PS Utd  
**Note:**  
 U19 divisions will play their quarter finals during the mid-week on Tuesday, November 10, 1998. (See Mr Vul for further information)

**Sunday, November 8, 1998.**

08.30	P/Reserve	Tarangau vs Guria
10.00	W2	Guria vs WMI Togelu
11.30	W1	ICF Uni vs Winner of Normads/Wanzesi
01.00	Second	Bao-Mitas vs YMZ
02.30	First	Nisco vs GFC
04.00	First	Coecon Ela Utd vs Normads

**Bisini Two**

08.30	Second	Bau Futz vs SPB
10.00	W1	Tarangau vs Loser of Normads/Wanzesi
11.30	W1	Telikom vs TST Stars
01.00	Premier	Blue Kumuls vs ICF Uni
03.00	Premier	Rapatona vs FBH Defence

**Note:**  
 All teams will play double games both on Saturday and Sundays. Commencing on November 14-15, 1998. Grand finals will be played on 21 and 22 November, 1998.

### RULES OF FINAL NEW FORMAT

1. Top 7 teams in each division will play in final.

**Draws**

Wk1 - bye

G1	2 v 3
G2	4 v 5
G3	6 v 7

Wk 2 G4 Winner of G1 vs League champion

G5	Loser of G1 vs Winner of G2
G6	Loser of G2 vs Winner of G3
	Loser of G3 - out

**Wk 3 - Saturday - Quarter Finals**

Winner of game 4 - stand by for grand final

G7	Loser of G4 vs Winner of G5
G8	Loser of G5 vs Winner of G6
	Loser of G6 out

**Sunday Semi Finals**

Wk 3 G9 Winner of Game 7 vs Winner of Game 8  
 Loser of Game 7 and Loser of Game 8 out

Wk 5 G10 Winner of Game 9 vs Winner of Game 4

This rule applies to all other divisions.

### NCD PUBLIC SERVANTS SOCCER ASSOCIATION

#### WEEKEND PRE-SEASON

Saturday November 7, 1998.

TEAMS	GROUND	TIME
Education v Air Niugini	(M) UPNG TOA 1	09:00
Education v Air Niugini	(W) UPNG TOA 1	10:30
Telikom v Harbours	(M) UPNG TOA 1	11:00
Telikom v Harbours	(W) UPNG TOA 1	12:00
UPNG v NBC	(M) UPNG TOA 1	13:00
UPNG v NBC	(W) UPNG TOA 1	14:00
Works v NPF	(W) UPNG TOA 1	15:00
Works v NPF	(M) UPNG TOA 1	16:00

Teachers v Defence	(M) UPNG TOA 1	09:00
Teachers v Defence	(W) UPNG TOA 1	10:00
Transport v NCDC	(M) UPNG TOA 1	11:00
Transport v NCDC	(W) UPNG TOA 1	12:00
DAL v DCA (M)	UPNG TOA 1	13:00
DAL v DCA (W)	UPNG TOA 1	14:00
POSF v IRC	(W) UPNG TOA 1	15:00
POSF v IRC	(M) UPNG TOA 1	16:00
Diwai v Fisheries	(M) Inserv College	09:00
Diwai v Fisheries	(W) Inserv College	10:00

PNGBC v BPNG	(M) Inserv College	11:00
PNGBC v BPNG	(W) Inserv College	12:00
NSO v PMGH	(M) Inserv College	13:00
NSO v PMGH	(W) Inserv College	14:00
Comm & Ind v A/General	(W) Inserv College	15:00
Comm & Ind v A/General	(M) Inserv College	16:00

Central Dept v McGregor Pol (M) UPNG Main Oval 09:00  
 Central Dept v McGregor Pol (W) UPNG Main Oval 10:00

ICPNG v Cellnet	(M) UPNG Main Oval	11:00
ICPNG v Cellnet	(W) UPNG Main Oval	12:00
Looser Game 14 v NCC	(W) UPNG Main Oval	14:00
Looser Game 14 v NCC	(M) UPNG Main Oval	15:00

**Sunday November 8, 1998.**

Winner G1 v Winner G2	(M) UPNG TOA 1	09:00
Winner G1 v Winner G2	(W) UPNG TOA 1	10:00
Winner G3 v Winner G4	(M) UPNG TOA 1	11:00
Winner G3 v Winner G4	(W) UPNG TOA 1	12:00
Winner G5 v Winner G6	(M) UPNG TOA 1	13:00
Winner G5 v Winner G6	(W) UPNG TOA 1	14:00
Winner G7 v Winner G8	(W) UPNG TOA 1	15:00
Winner G7 v Winner G8	(M) UPNG TOA 1	16:00

Winner G13 v Winner G14	(M) UPNG TOA 1	09:00
Winner G13 v Winner G14	(W) UPNG TOA 1	10:00
Winner G9 v Winner G10	(M) UPNG TOA 1	11:00
Winner G9 v Winner G10	(W) UPNG TOA 1	12:00
Winner G11 v Winner G12	(W) UPNG TOA 1	13:00
Winner G11 v Winner G12	(M) UPNG TOA 1	14:00
Winner: Looser G14 or NCC v	UPNG TOA 2	15:00

Winner: Looser G13 or GIA (W) Winner: Looser G13 or NCC v UPNG TOA 2 16:00  
 Winner: Looser G13 or G14 (M)

### ENBSA - PRE SEASON 1998/99

Saturday November 7, 1998.

**Diamond I (Men)**

11.00am	Fuji Bears vs Yokomo
12.15pm	B/Pythom vs NGI
13.30pm	Ivarak vs Barom
14.45pm	H. Hawks vs RYC
16.00pm	Fuji Bears vs Barom

**Diamond II (Women)**

11.00am	Kuli vs Yokomo
12.15pm	Post PNG vs Ivarak
13.30pm	PNGBC vs Kuli
14.45pm	RYC vs Ivarak
16.00pm	Yokomo vs C. Vui

**Sunday November 8, 1998.**

**Diamond I (Mens)**

12.30pm	RYC vs NGI
13.45pm	Yokomo vs Ivarak
15.00pm	B/Pythoms vs Wantoks
16.15pm	NGI vs H. Hawks

**Daimond II (Women)**

12.30pm	PNGBC vs C. Vui
13.45pm	RYC vs Post PNG
15.00pm	PNGBC vs Yokomo
16.15pm	C.Vui vs Kuli

### LALOKI SOCCER ASSOCIATION

Saturday November 7, 1998.

**Ground: Goldie**

Time	Div	Fixtures
12.00	W	Waliya vs B/Bisa
13.00	2	IMDK vs B/Bisa
14.00	2	Goldie Eels vs Ehave Utd
15.00	1	Op Bros vs B/Bisa
16.00	1	OPS vs Goldie Eels

**Sunday November 8, 1998.**

12.00	W	Goldie vs Yareba
13.00	2	Yareba vs Op Bros
14.00	2	Goldie Eels vs IMDK
15.00	1	DD7 vs YMCA
16.00	1	DD7 vs Yareba

### LALOKI SOCCER POINTS LADDER

**FIRST DIVISION**

TEAMS	P	W	L	D	G/F	G/A	PTS
DD7	8	2	1	5	9	5	15
Yareba	8	3	1	4	8	3	15
Goldie Eels	8	2	2	4	8	4	12
OPS	8	3	3	2	6	3	12
Ehave Utd	8	2	1	5	5	3	12
B/Bisa	8	3	2	3	4	1	12
DAL	8	2	3	3	7	4	11
IMDK	8	2	3	3	4	3	10
YMCA	8	1	3	4	4	5	9

**SECOND DIVISION**

DD7	8	4	1	3	6	1	15
YMCA	8	4	2	2	7	5	14
Ehave Utd	8	3	1	4	6	4	14
Goldie Eels	8	3	1	4	8	7	13
Yareba	8	3	3	2	9	6	12
OPS	8	2	2	4	0	4	11
IMDK	8	2	4	2	9	5	10
B/Bisa	8	0	2	2	6	3	8
DAL	8	1	5	2	6	11	6

**WOMEN DIVISION**

- 1. Goldie Eels
- 2. Yareba
- 3. B/Bisa
- 4. Waliya

### GORDONS TOUCH ROUND FIVE

Saturday, November 7, 1998.

C1	0800	Eagles vs Bulldogs
C2	0840	Tigers vs Magpies
C3	0920	Storms vs Panthers
C4	1000	Raiders vs Rabbits
C5	1040	Heelers vs Dragons

B1	1120	Steelers vs Eels
B2	1210	Tigers vs Magpies
B3	1300	Warriors vs Sharks

A1	1350	Steelers vs Eels
A2	1500	Eagles vs Bulldogs
A3	1610	Tigers vs Magpies

**Sunday November 8, 1998.**

C1	0800	Sharks vs Warriors
C2	0840	Steelers vs Eels




B2	1010	Storms vs Panthers
B3	1100	Raiders vs Rabbits
B4	1150	Heelers vs Dragons

A1	1240	Storms vs Panthers
A2	1350	Warriors vs Sharks
A3	1500	Raiders vs Rabbits
A4	1610	Heelers vs Dragons



# ZENAG - Gutpela kiau

# WANTOK SPOT



## Nelly redi long joinim Australia soka klap

STRAIKA bilong Papua Niugini wimen soka tim Nelly Taman bai kamap namba wan kontrak pilaia long pilai soka long Australia.

Taman i putim olgeta tingting na hop bilong em long presiden bilong Papua Niugini Futbol Asosiesen Peter Mommers long stretim agrimen o kontrak bilong em wantaim Australia Wimens Soka Federesen.

Presiden bilong Australia Wimens Soka Federesen Dennis O'Brien i soim bikpela laik long kisim Taman long pilai long wanpela klap long Sydney.

O'Brien i bin askim Mommers taim em i lukim Nelly i pilai wantaim PNG tim long Osenia Wimens Wol Kap kwalifaia long Nu Silan i no longtaim i go pinis.

"Mi gat laik long namba 10. Em i gutpela pilaia na mi ken helpim em long pilai long Sydney o Brisbane," O'Brien i tok olsem.

Mommers yet i no guria bikos O'Brien i wanpela man i save opim maus tumas. Na em i askim Nelly Taman long noken guria tu inap olgeta samting bilong pilai long Australia i redi.

Presiden i tok em bai gutpela tru long developmen bilong soka. Sapos Nelly i go pilai long Australia, em bai namba wan lokel PNG pilaia i kontrak long pilai ovasis.

Tripela pilaia i traim long winim kontrak tasol ol i no laki tumas em John Tutumang (Marconi), Moni Kalong (Sydney Croatia) na Desmond Waku (Sydney Croatia).

Arapela pilaia husat i pilai tupela sisen long wantaim Canberra Cosmos em John Lamong (Forova).

Biknem Manis Lamond i pilai wantaim planti ol arapela klap long Sydney olsem Sydney Croatia, Brisbane Marconi na Wollongong Wovles long Nesenel Soka Lig long Sydney, Australia.

Nelly i tokim *Wantok* olsem em i amamas tasol sapos PNGFA i stretim olgeta rot bilong em long pilai.

I tru em i namba wan meri long pilai long Australia, Nelly i tok em bai traim long apim nem bilong PNG na kamap gutpela ambesada bilong soka.

Planti ol biknem soka pilaia bilong PNG i amamas tru olsem wanpela meri i redi tasol long salens long kontrak.

Mommers i tok trening long Australia i gutpela na dispela bai strongim tru soka bilong ol meri long kantri ya.



Nem: NELLY TAMAN

Age: 22

Provins: Hapkas Kairuku na Morobe (Erap)

Klap: Telikom, Pot Mosbi

Rep futbol:

- 1993 Pot Mosbi skwat
- 1994 Osenia Wol Kap long Pot Mosbi - PNG tim
- 1996 Polinesia Kap Tonga - PNG win
- 1998 Nesenel Klap salens - Sydney, Australia

Toktok: Sapos i tru mi winim kontrak long Australia, mi laik tok tenkyu long ol lain husat i sapotim mi long pilaia soka. Namba wan lain em ol famili bilong mi long Gorden Bareks, ol pre, na wanpilai long Telikom klap na ol kosa olsem Kisakiu Posman, Robert Papat, John Davani na Francis Moiyap

# Kokopo bai holim PNGSF jeneral miting

## PNGSF SOFBAL RIPOT

### HENRY MORABANG i raitim

PAPUA Niugini Sofbal Federesen bai holim anual jenerel miting (AGM) bilong em long Kokopo long Novemba 28.

Sekretari bilong PNGSF Wesley Pialkolos i askim olgeta memba asosiesen long redi long dispela bikpela kibung bilong sofbal.

Pialkolos i tok olsem insait long miting, presiden bai tokaut long ripot bilong em na tresera tu bai tokaut long ripot.

Na ol memba asosiesen mas redi long bai afiliesen fi bilong neks sisen. Sapos wanem ol asosiesen i no baim afiliesen fi, ol bai i no inap holim vot o mekim toktok insait long jenerel miting ya.

Presiden Henry Kila i tokim *Wantok* olsem dispela em i bikpela miting we PNGSF bai tokaut long plen bilong neks ya.

Samting ol bikpela toktok we bai kamap long miting em ripot bilong presiden na tresera.

*Wantok* i askim sapos bai i gat ileksen, Kila i bekim na tok olsem em i gat tupela yia i stap yet olsem presiden.

Insait long sampela ol toktok, Kila i tok olsem em i save olsem i gat wanpela nupela asosiesen i stat long Is Nu Briten. Dispela asosiesen em Rabaul Amata Sofbal Asosiesen. (RASA).

Presiden Kila i tok em i harim na i givim tok orait long ol i ken ranim resis bilong ol yet.

Na em i min olsem Is Nu Briten bai i gat tupela sofbal asosiesen. Mama sofbal asosiesen em Is Nu Briten Sofbal Asosiesen we Francis Rangattin wantaim ol opisel bilong em i go pas.

Kila i tok long i gat tupela asosiesen em i no nupela samting. Bipo Rabaul i gat tupela asosiesen olsem Rabaul na Kokopo. Tasol taim maunten i pairap long 1994, i bin i gat wanpela asosiesen we ol i kolim Is Nu Briten.

Lukim moa Sofbal nius long pes 20 na 21

## HAILENS SOKA RIPOT

HAILENS Soka Federesen i redi nau long holim namba wan Hailens Open Soka kla sempionsip long Mt Hagen.

Tupela man i go pas long dispela ogenaisesen Popo Ananias na David Chung long Mt Hagen i tok dispela tonamen bai stat long Novemba 28 na pinis long Mas 1 long neks ya.

Ananias husat i makim maus bilong HSF i tokim *Wantok* olsem em i namba wan taim HSF bai holim dispela tonamen. Na dispela

## Hagen holim Hailens Open klap soka taitel

tonamen i op long ol klap insait long Hailens rijen long kam resis.

Ananias i tok ol i bin askim Lae Futbol Asosiesen na Lahi Soka Asosiesen long putim sampela tim. Nau yet 4-pela klap insait long LFA na tupela klap long Lahi i soim laik long dispela resis.

As tingting bilong dispela tonamen em long givim sans long ol klap long stap insait long dispela resis. Ananias i tok ol tim bilong haitens rijen bai kisim namba spes

na bihain ol lain long Lae i ken kam insait.

Samting olsem 32 klap bilong ol man i soim laik pinis na 20 klap bilong ol meri tu i soim laik long kik insait long dispela tonamen.

Ananias i tok bai i gat 8-pela pul bilong ol man, na 4-pela tim bai stap insait long wanwan pul. Orait bai i gat 4-pela pul bilong ol meri we 5-pela tim bai stap insait long en. Nominesen fi bilong Hailens Open Klap soka sempionsip em

K300. Ol dispela klap bai resis long winim K16,000 we ol oge-naisa bai brukim ya.

Ananias i tokaut olsem tupela biknem sponsa long Mt Hagen Coca Cola na Wills (PNG) i gat tingting long sapotim dispela tonamen.

Em bai namba wan taim dispela kain tonamen bai kamap long Papua Niugini. Ananias na Chung i tok dispela em long strong klap long lokel level. Ol klap i stap na ol

asosiesen i stap we i gat nesenel bodi. Sapos nogat klap, ating bai nogat ol asosiesen na tu nogat soka resis insait long kantri.

Ananias i askim wanem ol klap i gat tingting i mas salim nominesen fi long dispela akaun long PNGBC - Mt Hagen. Akaun namba em 400953.

Em i tok sapos wanem ol klap i no baim bai i no inap stap insait long tim. Dispela soka resis i wankain olsem nesenel klap sempionsip bilong PNGFA, tasol dispela tonamen em bilong ol klap insait long hailens rijen.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.